

DIDZA' DXI'A BUZÚAJË' MARCOS

*Libán benë' Juan, bönni' buquilë' bönachi nisa
(Mt. 3:1-12; Lc. 3:1-9, 15-17; Jn. 1:19-28)*

¹ Caní gusí lo didza' dxi'a ca guca queë' Jesu-cristo, Zxi'inë' Dios.

² Budxín lë na' buzúajë' lu guichi Isaías, bönni' bë'e didza' uláz queë' Dios, le gunné' Dios: Buyútsöca', risöl-la'a bönni' gubáz quia', inöruë' Lo'.

Lë' upë'e nöza ga tödu'.

³ Yön chi'e tu bönni' ulidzë' zidzaj lu lataj cá'asö, innë':

“Buli'pá'a nöza para idxín Xanru' yichaj lázxdö'oli'. Buli'béaj li yugu' nöza lasi ga tödë'.”

⁴ Caní budxín, tu' ruquilë' Juan bönachi nisa lu lataj cá'asö, en runë' libán para ila'dila bönachi nisa, bönni' na' bulu'bí'i ládxi'gaquië' para uniti lahuë' Dios dul-la' nabága'gaquië'. ⁵ Bila'rúaj bönachi zían yúgu'të yödzö luyú Judea, enca' yödzö Jerusalén, en yójáquië' ga na' zoë' Juan, ate' Juan na' buquilë' légaquië' nisa lu yegu Jordán, bönni' na' gula'xóalëpë' dul-la' nabága'gaquië'.

⁶ Nácuë' Juan lari' néquini lítsa'ba' böa', en núguë'e lë'e tu guídi. Rahuë'-ba' böchi'zu, en re'jë' le zxixi que buzdo'. ⁷ Runë' Juan libán, rnnë':

—Si' zë'e bönni' tödi na'a, náparë' yöl-la' unná bë' ca neda'. Biti' naca' neda' lesaca' yéchua', para ilecja' xiráchuë' nudë'e. ⁸ Neda' ruquila' libí'ili'

nisa, pero Lë' gunë' le rulu'isö yöl-la' ridila nisa ni, uchízië' libí'ili' Dios Bö' Lá'ayi.

Ridilë' Jesús nisa

(Mt. 3:13-17; Lc. 3:21-22)

⁹ Tu dza ni' birúajë' Jesús yödzö Nazaret luyú Galilea, ate' Juan na' buquilë' Lë' nisa lu yegu Jordán. ¹⁰ Cate' burúajë' Jesús lu nisa, la' ná'asö bilé'enë' gyalaj lúzxiba, en ruhuötjë' Dios Bö' Lá'ayi, rulu'i cuinë' ca tuba' gu'dödo', en bidisóalenë' Lë'. ¹¹ Biyön chi'i nu ru'i didza' yehua' yubá, rna:

—Li' nacu' Zxi'ina'. Nadxi'ida' Li', en raza ládxa'a Li'.

Rë'ëni tu' xihui' gun ga ibáguë'ë Jesús dul-la'

(Mt. 4:1-11; Lc. 4:1-13)

¹² Ní'irö Dios Bö' Lá'ayi guchë'ë Jesús bayudxi lu lataj cá'asö. ¹³ Guzóë' Jesús lataj cá'asö na' idú choá' dza, ate' gú'uni Satanás tu' xihui' gun ga ibáguë'ë Jesús dul-la'. Guzóë' Jesús ga ni' ta'daba' böa' guixi' dzö'öba' gu'ado'. Yugu' gubáz lá'ayi queë' Dios gulácalenë' Jesús, en gula'gu'ë le gu-dahuë'.

Rusédinë' Jesús bönachi luyú Galilea

(Mt. 4:12-17; Lc. 4:14-15)

¹⁴ Gudödi gula'gu'ë Juan na' lidxi gu'ë, sa'yéajë' Jesús luyú Galilea. Runë' libán ni' que didza' dxi'a ca rinná bë'ë Dios. ¹⁵ Caní rnnë':

—Chibidxín dza. Chizóa idinná bë'ë Dios. Buli'bí'i ládxi'li', en guli'tséajlé' didza' dxi'a ni.

Rulidzë' Jesús tapë' bönni' uzxön böla

(Mt. 4:18-22; Lc. 5:1-11)

¹⁶ Tsanni ni' ridě' Jesús ra' nísado' luyú Galilea, bilé'eně' Simón len Andrés, bōnni' bōchě'ě Simón na'. Nácagaquiě' uzxōn bōla, en ta'chiljě' yōxaj bōla quégaquiě' lu nisa na'. ¹⁷ Jesús gudxě' légaquiě', rnně':

—Guli'dutá' neda', ate' guna' ga ichě'ěli' bōnachi quia' neda', gunli' ca runli' rizōnli'-ba' bōla.

¹⁸ La' bulu'cá'anatě' yōxaj quégaquiě', en sōjácaleně' Jesús.

¹⁹ Gudödě' Jesús ia'láti'do' ní'ilō, ate' bilé'eně' Jacobo, en Juan, yugu' zxi'ině' Zebedeo, nacu'ě' lě'e bárcodo' quégaquiě', tu'úně' yōxaj bōla quégaquiě'.

²⁰ Jesús la' bulidztě' légaquiě', ate' bulu'cá'aně' xúzgaquiě' Zebedeo, dzáguiě' yugu' huen dxin queě' lě'e bárcodo' na', ate' sōjácaleně' Jesús.

Tu bōnni' yu'u lě' bō' xihui'

(Lc. 4:31-37)

²¹ Bila'dxině' Jesús, en yugu' bōnni' dá'gaquiě' Lě' lu yōdzō Capernaum. Cate' ni' naca dza lá'ayi quégaquiě' bōnni' judío, guyáziě' Jesús yu'u ga tu'dubě' bōnni' judío, en tu'sědě' queě' Dios, ate' gusi lahuě' rusédině' nupa nudúbigaca ni'.

²² Bulu'bánni' ca na' rusédině' Jesús, tu' rusédině' ca runě' tu bōnni' dē lu nē'ě, en calēga ca tuně' bōnni' yudo' usēdi. ²³ Zóatě' ca' tu bōnni' yu'u lě' bō' xihui' lu yu'u ga na' tu'dubě' tu'sědě' queě' Dios, ate' gurōdxi'ě bōnni' na', rnně':

²⁴ —¿Bizxi rál-la'tu' quiu', Jesús, bōnni' Nazaret? ¿Za'tsu' usunítui' netu'? Núnbě'a Li', nacu' Bōnni' Lá'ayi queě' Dios.

²⁵ Jesús buzeně' le bach, rnně':

—Busayaj ru'u, en burúaj lu bōnni' ni.

²⁶ Ní'irö bö' xihui' na' buxízida' bönni' na' yu'u lè', ate' gurödxí'a zidzaj, en la' burúajtè.
²⁷ Bulu'báninè' yúgu'tè bönni' nacu'è ni', ate' gula'nabi luzè'egaquiè', ta'nnè':

—¿Bizxi caz lè ni? ¿Naru' nácatsö xibá cubi? ¡Len yöl-la' unná bè' rinná bé'enè' yugu' bö' xihui', ate' tun ca rnnè'!

²⁸ La' guzètè didza' que yöl-la' huáca queè' Jesús, ate' bila'yöni bönachi idútè luyú Galilea na'.

Ruúnè' Jesús xiná'anú nigula queè' Pedro
 (Mt. 8:14-15; Lc. 4:38-39)

²⁹ Ní'irö burúajè' Jesús lu yu'u ga na' tu'dubè' tu'sèdè' queè' Dios, en la' guyéajlentè' Jacobo, en Juan, ate' bila'dxinè' lídxigaquiè' Simón, en Andrés.

³⁰ Ní' dènu xiná'anú nigula queè' Pedro, yú'unu tu xilá. La' gula'guíxjöi'itenè' Jesús ca raca queènu.

³¹ Ní'irö gubígui'è Jesús, ate' gudélè'è ná'anú, en guchisè'-nu. La' burúajtè tu xilá na' yú'unu, ate' bupá'anú le gulahuè'.

Ruúnè' Jesús zían nupa te'e
 (Mt. 8:16-17; Lc. 4:40-41)

³² Cate' chiridzö', ca gudxía gubidza, la' du-juá'gacatè' yúgu'tè nupa te'e, en yugu' bönni' yu'u légaquiè' bö' xihui' ga zoè' Jesús. ³³ Yúgu'tè bönachi lu yödzo bila'guirö ga nu riyaza yu'u ga na' zoè' Jesús. ³⁴ Jesús bunè' zían nupa te'e, naca zían yödzöhuè' té'enè'. Bubéajè' ca' zían bö' xihui' yú'ugaca bönachi na'. Biti' bè'è lataj ila'nnè bö' xihui' na' tu' núnbè'gaca Lè' Nu náquiè'.

Runè' libán Jesús luyú Galilea
 (Lc. 4:42-44)

³⁵ Zí'acado' guyasë' Jesús, ni' naca chul-la. Burúajë' yödzo na', en sa'yéajë' tu lataj cá'asö, ate' ni' bulidzë' Dios. ³⁶ Simón, en nupa nacua'len lë' söjdíljagaquië' Jesús. ³⁷ Cate' yöjxáca'gaquië' Lë', tē' Lë':

—Yúgu'tē bönachi tu'guílaj Li'.

³⁸ Ní'irö Jesús gudxë' légaquië', rnnë':

—Uyéajru' yugu' dzaga yödzo, para guna' ca' libán ni'. Que lë ni na' birúaja'.

³⁹ Caní guca, gudödë' Jesús idú luyú Galilea, runë' libán lu yu'u gapa tu'dubë' bönni' judío, tu'sëdinë' queë' Dios, ate' rubéajë' bö' xihui' yú'ugaca bönachi.

*Tu bönni' ré'enë' huë' nudzu' ruzödi
(Mt. 8:1-4; Lc. 5:12-16)*

⁴⁰ Tu bönni' ré'enë' huë' nudzu' ruzödi bidxinë' ga zoë' Jesús. Buzóa zxibë', en gúta'yuë' lahuë', rnnë':

—Channö rë'ënu', huáca unu' neda'.

⁴¹ Jesús buéchi' ládxë'ë lë'. Bulí në'ë, gudanë' lë', en gudxë' lë':

—Rë'ënda'. Chinuhuöácu'.

⁴² Ca gunnë' ca', la' bunítitë huë' ré'enë', en böáquië' dxí'ado'. ⁴³ Ní'irö Jesús buzenë' bach bönni' na', en la' busöl-la'të' lë'. ⁴⁴ Caní gudxë' lë':

—Cuntu nu guío' ca bena' quiu', pero guyéaj, yöjluí' cuinu' lahuë' bixúz, en yöjnödzej para le böácanu' lí' que yudo' ca na' gunná bë'ë Moisés, lë na' uluí' bönachi chinuhuöácu'.

⁴⁵ Burúajë' bönni' ni, en gusí lahuë' riguíxjöi'inë' bönachi zían ca guca queë'. Tu' buzë' didza' ni, bíti'rö guca tsázië' Jesús yálajdo' tu lu yödzo, pero

guzóasë' ní'ilö gapa naca lu lataj cá'asö. Bönachi yúgu'të yödzo bila'dxín ga na' zoë' Jesús.

2

Bönni' ré'enë' huë' nacú'unië' bin
(Mt. 9:1-8; Lc. 5:17-26)

¹ Cate' chigudödi chopa tsonna dza, buázië' Jesús yödzo Capernaum, ate' guzé didza' zoë' yu'u.

² La' bulu'dúbitë bönachi zían ga na' zoë' Jesús, ga bidxintë bíti'rö guzxéqui' ila'cuá' ni', ni ra' yu'u, ate' Jesús benë' libán que xtídzë'ë lógaquië'.

³ Ní'irö bila'dxinë' ga na' zoë' Jesús tapë' bönni', nuá'agaquië' tu bönni' huë' nacú'unië' bin. ⁴ Biti' guca ila'dxinë' lahuë' Jesús tu' nacuá' bönachi zían ni'. Que lë ni na' gula'saljë' ícjo'olö ca dödilö ga zoë' Jesús. Cate' budxi bulu'dxië' yeru na', ni' bulu'zötjë' le denë' bönni' huë' na'. ⁵ Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Zxi'ina', chibunít lahua' li' ca naca dul-la' nabágu'u.

⁶ Rő'ögaquië' bal-lë' bönni' yudo' usedi ni'. Ta'zá' ládxi'gaquië', ta'nnë': ⁷ ¿Bizx que ru'ë caní didza' bönni' ni? Rucá'anë' cá'asö Dios. Cuntu nu bönni' gaca uniti lahuë' dul-la'. Tuzë' Dios gaca gunë' lë ni. ⁸ La' gúquibe'etenë' Jesús le ta'zá' ládxi'gaquië', ate' gudxë' légaquië':

—¿Bizx que rizá' ládxi'li' caní? ⁹ Biti' naca böniga nu guiësö bönni' huë' ni chibuníti lo dul-la' nabáguë'ë, pero naca böniga nu gun ga huóásë', en u'ë le denë', en uzë'e ni'ë. ¹⁰ Guna' le gaca bë' neda', Bönni' Guljë' Bönachi, dë lu na'a luyú ni uniti lahua' dul-la' nabága'gaca bönachi.

Ní'irö Jesús gudxë' bönni' huë' na':

¹¹—Li' rea': Guyasa. Buá' le denu', en böaj lidxu'.

¹² La' guyásatë' bönni' huë' na', bu'ë le gúti'në', en burúajë' lógaca yúgu'të nupa nacuá' ni'. Bulu'bánninë' yúgu'të', en gula'gu'ë Dios yöl-la' ba, ta'nnë':

—Catu caz rilé'etu' le caní.

Jesús rulidzë' Leví

(Mt. 9:9-13; Lc. 5:27-32)

¹³ Burúajë' Jesús yödzö Capernaum, na' gudödë' leyúbölö ra' nísado'. Bulu'dubi bönachi zían ga zoë' Jesús, ate' Lë' busédinë' légaquië'. ¹⁴ Cate' ridödë' Jesús ni', bilé'enë' Leví, zxí'inë' Alfeo, rö'ë ga ruquíxjë' uláz que yödzö zi'tu'. Jesús gudxë' lë': —Gudá' neda'.

La' guyásatë' Leví na', sa'yéajlenë' Jesús.

¹⁵ Gudödi guca lë ni, rö'ë Jesús rahuë' lu yu'u lidxë' Leví na', ate' zían bönni' uquíxaj, en ia'bal-lë' bönni' cá'asö rö'ölengaquië' tsözxön Jesús, en yugu' bönni' usëda queë'. Caní guca, tu' röjaca bönachi zían len Jesús. ¹⁶ Cate' yugu' bönni' yudo' usedi, en yugu' bönni' yudo' fariseo, bila'lé'enë' Lë' rö'ë rágulenë' tsözxön yugu' bönni' uquíxaj, en ia'bal-lë' bönni' cá'asö, gulé' yugu' bönni' usëda queë' Jesús, ta'nnë':

—¿Bizxi caz runtsë'? ¡Rë'aj rágulentsë' yugu' bönni' uquíxaj, en ia'bal-lë' bönni' dul-la'!

¹⁷ Biyönnë' Jesús didza' ni tu'ë, en gudxë' légaquië':

—Nupa nacuá' dxi'a biti' naquíniguequi nu un bönachi, pero nupa te'e naquíniguequi nu un bönachi. Za'a neda', calëga dulídzagaca' bönachi

tsahui', pero rulídzagaca' bönachi dul-la' para ulu'bí'iládxigaca.

*Ru'ë Jesús didza' que yöl-la' run gubasa
(Mt. 9:14-17; Lc. 5:33-39)*

¹⁸ Tu dza ni' tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bila'dxín nupa gula'nabi Jesús, ta'nná:

—¿Bizx que tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, pero bönni' dá'gaquië' Li' biti' tunë' gubasa?

¹⁹ Bubi'ë didza' Jesús, rë' légaquië':

—¿Naru' réquitseli' ilún gubasa nupa nacua' laní queë' bönni' rutsaga në'ë tsanni ni' bönni' na' rutsaga në'ë zóalenë' légaquië'? Tsanni ni' bönni' na' rutsaga në'ë zóalenë' légaquië', biti' gaca ilunë' gubasa. ²⁰ Idxín dza cate' udúë' bönni' na' rutsaga në'ë, en bítirö sóalenë' légaquië', ate' dza ní'rö ilunë' gubasa.

²¹ 'Cuntu nu bönni' udë'ë tu lari' cúbido' lu lari' chinatëbi, tu' utsupí lari' cubi na', en huachöza' lari' tëbi na', ate' huaröza'rö lari' tëbi na'. ²² Lësca' caní cuntu nu bönni' quë'ë xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

*Bönni' dá'gaquië' Jesús ta'lecjë' do dza lá'ayi
(Mt. 12:1-8; Lc. 6:1-5)*

²³ Tu dza lá'ayi quégaquië' bönni' judío, gudödë' Jesús gapa dë yöla zxoá' xtila, ate' bönni' usëda queë' gula'sí lógaquië' ta'lecjë' do ga dxía zxoá'

xtila. ²⁴ Ní'irö bönni' yudo' fariseo gulë' Jesús, ta'nnë':

—Buyútsöca'. ¿Bizx que tunë' bönni' dá'gaquië' Li' le cabí ral-la' gunru' dza lá'ayi?

²⁵ Jesús gudxë' légaquië':

—¿Naru' cabí nulábanili' ca benë' David cate' gudunë'? Biyadzaj le ilahuë' lë', en nupa nacuá'len lë' ²⁶ ate' guyázië' lu yu'u queë' Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Dios, lë na' bití' dë lataj nu gagu, pero tuz bixúz dë lataj ilahuë' le. Bë'ë ca' le ilahuë' bönni' nacuá'lenë' lë'.

²⁷ Ní'irö Jesús gudxë' légaquië':

—Dios benë' dza lá'ayi le ulu'zí' xibé bönachi, calëga benë' bönachi para ilún chí'i dza lá'ayi.

²⁸ Que lë ni na', neda', Bönni' Guljë' Bönachi, naca' Xani dza lá'ayi.

3

Ruúnë' Jesús tu bönni' narequi' në'ë
(Mt. 12:9-14; Lc. 6:6-11)

¹ Leyúbölö guyu'ë Jesús tu lu yu'u ga tu'dubë' tu'sedë' bönni' judío queë' Dios, ate' zoë' ca' ni' tu bönni' narequi' në'ë. ² Bönni' yudo' nacu'ë ni' tu'yúë' Jesús channö únë' bönni' na' dza lá'ayi, tu' tē'ennë' ulu'zégui'ë Lë' didza'. ³ Ní'irö Jesús gudxë' bönni' na' narequi' në'ë, rnnë':

—Guyasa, en guzuí lógaca bönachi ni.

⁴ Jesús gunábinë' bönachi ni', rnnë':

—¿Naru' dë lataj gunru' le naca dxi'a cate' naca dza lá'ayi o gunru' le ruá' dö'? ¿Naru' dë lataj gunru' ga ila'deli' bönachi yöl-la' na'bán o usunítiru' le?

Gula'cuá' dxisö bönachi ni'. ⁵ Ní'irö len yöl-la' rilé queë', buyúé' Jesús bönachi na' nacua' gásibi'ilë'. Ruhui'innë' tu' nácagaquië' zidi ladxi'. Gudxë' bönni' na' narequi' në'ë, rnnë':

—Bulí no'o.

Ní'irö bulí në'ë bönni' na', ate' böácatë dxí'ado' në'ë. ⁶ Ní'irö bulu'rúajë' bönni' yudo' fariseo, ate' la' guluntë' tsözxön didza' len bönni' dá'gaquië' Herodes bi ilunë' queë' Jesús, para ilútië' Lë'.

Tu'dubi bönachi zián ra' nísado'

⁷ Buzë'ë Jesús ni' tsözxön len bönni' dá'gaquië' Lë', en bidxinë' ra' nísado', ate' sőjácalen Lë' bönachi zián narúajgaca luyú Galilea, en luyú Judea. ⁸ Bönachi zián narúajgaca Jerusalén, en luyú Idumea, en ia'tsölá'a yegu Jordán, en yugu' yödzö nacua' idú gásibi'ilö ga nacua' yödzö Tiro, en yödzö Sidón bila'dxín ca' ga zoë' Jesús. Caní gulunë', tu' bila'yönnë' ca nácagaca yugu' le zxön runë' Jesús. ⁹ Que lë ni na' Jesús gunná bé'enë' bönni' dá'gaquië' Lë' ulu'cöztica'së' tu bárcodo' ga gaca cuenë', para cabí ulu'quí bönachi zián na' Lë'. ¹⁰ Caní guca tu' chibunë' zián nupa te'e, ate' bila'guirö bönachi zián na' ga zoë' para ila'gán Lë'. ¹¹ Cate' bö' xihui' yú'ugaca bönachi bila'lë'e Jesús, bulu'dxiga' bönachi na' yú'ugaca xini'ë Jesús, ate' gula'bödxí'a, ta'nná:

—Nacu' Li' Zxí'inë' Dios.

¹² Jesús buzenë' le bach bö' xihui' na', cabí ila'guixjō' nu náquië' Lë'.

Riböë' Jesús chinnu bönni' ilácagaquië' gubáz queë' (Mt. 10:1-4; Lc. 6:12-16)

¹³ Ní'irö gurenë' Jesús tu lu guí'ado', ga ni' bulidzë' nupa rë'ënë'. Gula'biguë'ë bönni' ni gásibi'ilë'. ¹⁴ Jesús bucu'ë chínnuë' bönni' ni, para ila'cuá'lenë' Lë', en para isöl-lë'ë légaquië' tsöjéngaquië' libán. ¹⁵ Budödë' lu ná'agaquië' yöl-la' huáca ulu'únë' nupa te'e, en ulu'béajë' bö' xihui' yú'ugaca bönachi. ¹⁶ Caní nácagaca lágaquië':

Simón, (buzóë' Jesús ia'tú lë', Pedro),

¹⁷ Jacobo,

Juan, (bönni' böchë'ë Jacobo, ate' nácagaquië' zxi'inë' Zebedeo. Chopë' ni, Jesús buzóë' ia'tú lágaquië', Boanerges, le rnna lu didza' xidza': Bönni' sínia' ca guziú'),

¹⁸ Andrés, Felipe, Bartolomé, Mateo, Tomás,

Jacobo, (zxi'inë' Alfeo),

Tadeo,

Simón, (bönni' ruí'i ládxë'ë yödzö queë'),

¹⁹ Judas Iscariote, (bönni' udödë' Jesús lu ná'agaquië' bönni' ilútië' Lë').

Yugu' bönni' yudo' ta'nnë': "Tu' xihui' dzaga Jesús"

(Mt. 12:22-32; Lc. 11:14-23; 12:10)

Gudödi ni' Jesús len bönni' dá'gaquië' Lë' bulu'dxinë' tu lu yu'u. ²⁰ Leyúbölö bila'guirö bönachi zían ga zoë' Jesús, ate' bíti'rö guta' lataj bi ilahuë' Jesús, en bönni' na' dá'gaquië' Lë'. ²¹ Cate' di'a dza queë' Jesús bila'yönnë' ca raca queë', bila'dxinë' ni' para ulu'chë'ë Lë', ta'nnë': Richixi icjë'.

²² Lësca' caní bönni' yudo' usedi, narúajgaquië' Jerusalén gula'nnë' queë', ta'nnë':

—Dzaga Belzebú, xángaca bö' xihui' Lë', ate' len yöl-la' unná bē' que rubéajē' yugu' bö' xihui'.

²³ Ní'irö Jesús bulidzē' yugu' bönni' yudo' usedi na', en bucúdzu'ē didza', rnnē':

—¿Naru' ubéaj la' cuinsi Satanás tu' xihui'?

²⁴ Channö ila'rúaj choplō bönachi tu yödzo, en ila'díl-lalen luzē'eguequi, biti' gaca idía' yödzo na'. ²⁵ Lēasca' caní channö ila'rúaj choplō bönachi nacuá' tu yu'u, en ila'díl-lalen luzē'eguequi, biti' gaca ila'día' bönachi nacuá' yu'u na'. ²⁶ Que lē ni na', channö Satanás tu' xihui' tá'baga' luzē'e, narúajgaca choplō bö' xihui'. Biti' gaca idía' yöl-la' unná bē' que, pero chizóa údxí que.

²⁷ 'Cuntu nu gaca tsu'u lidxē' tu bönni' nál-la, en cuéaj yöl-la' tsahui' queē' channö cabí gaga' zí'alō bönni' nál-la na', ate' ní'irö sequi' cuéaj le dzō'ō lidxē'.

²⁸ 'Le nácatē rea' libí'ili': Dios gaca uniti lahuē' bönachi ca naca yúgu'tē dul-la' nabága'gaca, en ca naca yúgu'tē didza' schanní' ta'nná, ²⁹ pero núti'tēs nu innē schanní' queē' Dios Bö' Lá'ayi, catu caz uniti lahuē' Dios nu na'. Tsaz nabaga' xíguia' nu na'.

³⁰ Caní gunnē' Jesús tu' ta'nnē' queē' bönni' yudo' usedi na', ta'nnē':

—Tu' xihui' dzaga Lē'.

Nu naca xinē'ē Jesús, en bönni' böchē'ē

(Mt. 12:46-50; Lc. 8:19-21)

³¹ Ní'irö bila'dxinē' yugu' bönni' böchē'ē Jesús, enca' xinē'ē ga zoē'. Gula'cu'ē lö'alō, en gula'söl-lē'ē nu tsöjlidza Jesús. ³² Bönachi zían na' rō'gaca cuitē' Jesús gulē Lē', ta'nná:

—Yugu' bönni' böchu'u, enca' xinó'o nacu'ë lö'alö, tu'lidzë' Li'.

³³ Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' böcha'a?

³⁴ Ní'irö buyúë' nupa na' rő'gaca gásibi'ilë', rnnë':

—Buli'yútsöca'. Nupa ni nácagaca ca xiná'a, en yugu' bönni' böcha'a. ³⁵ Nu run ca rë'ënë' Dios, nu ni naca ca bi'i böcha'a, en bi'i zana' enca' xiná'a.

4

Rucúdu'ë didza' Jesús ca naca queë' bönni' guz
(Mt. 13:1-9; Lc. 8:4-8)

¹ Leyúbölö gusí lahuë' Jesús rusédinë' bönachi ga naca ra' nísado'. Bulu'dubi bönachi zían ga zoë', ate' gurenë' Jesús tu lë'e bárcodo' zxoá lu nisa na', en gurö'ë ni', ate' yúgu'të bönachi na' gula'cuá' luyú ra' nisa na'. ² Zían le busédinë' Jesús légaquië', bucúdu'ë didza'. Tsanni ni' rusédinë' légaquië', rnnë':

³ —Guli'zë nágalí' didza' ni. Birúajë' tu bönni' guz, sőjësië' xisedo'. ⁴ Tsanni ni' rúsië', gulasi bal-la xisedo' na' ra' nöza, ate' bila'dxinba' biguínido', gulé'ajba' le. ⁵ Gulasi ia'bal-la xisedo' na' ga rő'ö guiőj ga bití rő'ö yenni' yu. Bayön gula'lén xisedo' na' tu' cabí rő'ö yenni' yu. ⁶ Ní'irö cate' gulén gubidza, buquexu' le, ate' gubidxi, tu' cabí nun luí ga rë'. ⁷ Gulasi ia'bal-la xisedo' na' ga tu'lén lubá yötsi'. Cate' gula'lén xisedo' na', bulu'lén ca' lubá yötsi' na', en gula'röli le, ate' lë na' bësië' bití bi bunödzej. ⁸ Gulasi ia'bal-la xisedo' na' ga naca luyú bëbu, ate' gula'zxön, en xitsá' ra' gula'bő'.

Bulu'nödzej lë na' bësië'. Tu dxigu' xisedo' na' bësië' bunödzej ia'chí uruá' xisedo' ca'. Ia'tú bunödzej ia'tsónnalalaj ca', ate' ia'tú na' bunödzej ia'tú gayuá' ca'.

⁹ Ní'irö Jesús gudxë' légaquië', rnnë':

—Nu zoa nagui, en riyöni ral-la' uzë nagui.

Riguíxjö'ë Jesús bizx que rucúdzü'ë didza'
(Mt. 13:10-17; Lc. 8:9-10)

¹⁰ Cate' chibugá'anë' tuzë' Jesús, bila'dxín nupa dá'gaca Lë' ga zoë', núngaca tsözxön idxínnutë' bönni' usëda queë', ate' gula'nábinë' Lë' bi sa'yéaj lë na' bucúdzü'ë didza'. ¹¹ Jesús gudxë' légaquië', rnnë':

—Libi'ili' nadéli'li' tséajni'ili' le nagachi' ca rinná bë'ë Dios, pero nupa na' biti' nácgaca tuz len rë'u, ru'ílena' légaquië' didza' yugu' le rucúdzü'a didza'.

¹² Caní runa' para gaca lë na' nazúaj lu guichi lá'ayi, rnna:

Ulu'yüë', en biti' ila'lé'enë'.

Ulu'zë nágagaquië', en biti' ila'yéajni'inë'.

Biti' ulu'bí'i ládxi'gaquië' para gaca uniti lahua' légaquië' ca naca dul-la' nabága'gaquië'.

Riguíxjö'ë Jesús le bucúdzü'ë didza'
(Mt. 13:18-23; Lc. 8:11-15)

¹³ Jesús gudxë' ca' yugu' bönni' dá'gaquië' Lë', rnnë':

—¿Naru' cabí réajni'itseli' lë na' bucúdzü'a didza'? ¿Nacxi caz gaca tséajni'ili' ia'zíca'rö le ucúdzü'a didza'? ¹⁴ Bönni' guz na' náquië' nu ruzë xtídzë'ë Dios.

¹⁵ 'Nágagaca bal-la bönachi ca xisedo' na' gulasi ra' nöza. Ta'yönnë' xtídzë'ë Dios, en ca ta'yönisinë'

ca', la' za'të Satanás tu' xihui', en rigúa didza' na' bidxín lu icja ládxi'do'gaquië'.

¹⁶ 'Nácagaca ia'bal-la bönachi ca xisedo' na' gulasi ga rō'ö guiöj. Ta'yönnë' didza' na', ate' len yöl-la' rudzeja quégaquië' ta'zi'ë le. ¹⁷ Biti' riyaza icja ládxi'do'gaquië', ate' tu chí'isö ta'dë'ë le. Cate' bi raca quégaquië', o zoa nu ribía ladxi' légaquië' tu' ta'dë'ë didza' na', la' tu'huöatë ládxi'gaquië'.

¹⁸ 'Nácagaca ia'bal-la bönachi ca xisedo' na' gulasi ga na' tu'lén lubá yötsi'. Ta'yönnë' didza' na', ¹⁹ pero tu'i ládxi'gaquië' le nácagaca que yödölió ni. Nazi' yé'eguequinë' tu' nadxí'iguequinë' yugu' yöl-la' tsahui', en ta'zë ládxi'gaquië' yugu' le dë. Ta'yaza icja ládxi'do'gaquië' yúgu'të lë ni, en tu'suniti didza' na', para cabí gun dxin lu icja ládxi'do'gaquië'.

²⁰ 'Nácagaca ia'bal-la bönachi ca xisedo' na' gulasi ga naca luyú bëbu. Ta'yönnë' didza' na', en ta'zí' lu ná'agaquië' le, ate' run dxin lu icja ládxi'do'gaquië'. Nácagaca bal-la bönachi caní ca xisedo' na' bulu'nödzej ia'chí uruá' huéaj. Nácagaca ia'bal-lë' ca xisedo' na' bulu'nödzej ia'tsónnalalaj ca', ate' nácagaca ia'bal-la bönachi ca xisedo' na' bulu'nödzej ia'tú gayuá' ca'.

*Rucúdzü'ë didza' Jesús que tu le rigú'u bení'
(Lc. 8:16-18)*

²¹ Jesús gudxë' ca' bönni' dá'gaquië' Lë', rnnë':

—¿Naru' rigála'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní. Ruzóaru' guí' ga naca xitsá' ga cu'u bení'. ²² Yúgu'të le nagachi' ilá' lahui, ate' yúgu'të

le raca balándo'os ila'rúaj ga liná'. ²³ Nu zoa nagui, en riyöni ral-la' uzé nagui.

²⁴ Gudxë' ca' légaquië':

—Guli'güí' ládxi'li' le riyönili'. Ca naca le ruríxili', la' leze urixë' Dios queëli', ate' gunnë' queëli' ia'lati'. ²⁵ Nu nazí'i le za' que, gu'ë que ia'lati', pero nu biti' nazí'i le, la's dui le dë que, udúa.

Rucúdzu'ë didza' Jesús ca rizxön zxa' xtila

²⁶ Gunnë' ca' Jesús:

—Ca raca ni le rinná bë'ë Dios naca ca raca cate' ruchejë' tu bönni' zxa' xtila lu yu. ²⁷ Chi'i dzö'ölö rásië', en riyasë' cate' za' rení'. Ta'lén zxa' xtila na', en ta'zxön, pero biti' nözinë' lë' nacxi raca ta'zxön. ²⁸ La' cuinsi luyú na' ruxön le nadúzgaca luyú na', zí'alö xiyazi, ní'irö za' do que, en tödi na' cuía xui'i nál-la lu do que. ²⁹ Cate' chinal-la xui'i na', la' tséajtë' tsöjchibë' do na' tu' chibidxín dza uzi'ë xui'i.

Rucúdzu'ë didza' Jesús ca raca que xisé mostaza (Mt. 13:31-32; Lc. 13:18-19)

³⁰ Gunnë' ca' Jesús:

—¿Bizxi caz innaru' ca raca ni le rinná bë'ë Dios? ¿Bizxi ucúdzu'ru' didza' ca raca? ³¹ Raca ca raca que tu xisedo' mostaza. Cate' riyaza luyú naca tu xisedo' nácatërö cuidi' ca yúgu'të xisedo' dzö'ö luyú, ³² pero cate' chinadúz, rilén, en rizxöntërö ca yúgu'të guixi' cuan rö'gaca luyú. Tsca run yana' ni'a në'e, gaca ila'dxinba' biguínido', en ulu'dxíaba' xicá'agacaba' lu zxul-la que.

Ca rugunë' dxin Jesús le rucúdzu'ë didza' (Mt. 13:34-35)

³³ Caní guca, busédinë' Jesús légaquië', en ziánrö ca' le bucúdzu'ë didza' tsca guca ila'yéajni'inë'.
³⁴ Yúgu'të didza' bé'lenë' bönachi bucúdzu'ë didza', ate' yúgu'të didza' ni buchila lá'anë', buzéajni'inë' légacasë' bönni' usëda queë'.

Jesús ribequi dxíë' bö' budunu'

(Mt. 8:23-27; Lc. 8:22-25)

³⁵ La' dza ná'asö, cate' ridzö', Jesús gudxë' yugu' bönni' dá'gaquië' Lë', rnnë':

—Töditsöca'ru' ia'tsölá'a nísado' ni.

³⁶ Ní'irö bulu'lá'alënë' bönachi zián nacuá' ni', ate' bulu'së'ë bárcodo' ga na' chizóasë' Jesús. Gula'cuá' ca' ni' ia'zica'rö bárcodo' sőjácalen légaquië'. ³⁷ Gusí lo recja bö' budunu' lu nisa na', ate' gudá'a nisa lë'e bárcodo' na'. Ca' guca, zeaj ridzá' nisa lë'e bárcodo' na'. ³⁸ Dë' rásië' Jesús lu xicúgüë' ga naca xitsá'alö lë'e bárcodo' na', ate' bulu'subanë' Lë'. Të' Lë':

—¡Bönni' Usedi! ¿Naru' cabí ruí'i ládxi'tso' netu'? ¡Huáti caztu' lu nisa ni!

³⁹ Ní'irö guyasë' Jesús, en gunná bé'enë' bö' na' recja, gunnë':

—Gurö'ö dxi.

Gudxë' ca' nisa na', gunnë':

—Dxisö guzóa.

Gurö'ö dxi bö' na' guyecja, en guzóa dxi lu nísado' na'. ⁴⁰ Ní'irö Jesús gudxë' yugu' bönni' dá'gaquië' Lë', rnnë':

—¿Bizx que radxi ridzöbili' caní? ¿Naru' cabí réajlë'ëli' Dios?

⁴¹ Ni' tádxinë' gulë luzë'ë tuë' ia'tué':

—¿Nuzxi caz bönni' ni? ¡Tun bö' recja, en nísado' ca rnna xtídzë'ë!

5

Bönni' Gadara yu'u bö' xihui' lë'

(Mt. 8:28-34; Lc. 8:26-39)

¹ Ní'irö bila'dxinë' Jesús, en yugu' bönni' dá'gaquië' Lë' ia'tsölá'a nísado' ga naca lu xiyúgaca bönachi Gadara. ² Cate' burúajë' Jesús lë'e bárcodo' na', tu bönni' rirúajë' zxa bulóaj ga nacuá' yeru ba la' dutságatë' Lë'. Bönni' ni yu'u bö' xihui' lë', ³ ate' nun xilatjë' ga na' nacuá' yeru ba. Cuntu nu guca guga' bönni' na', calëga len du guié. ⁴ Zián luzuí bulu'zóë' bregui' guié yen në'ë, en ni'ë, en gulúgui'ë lë' du guié. Yugu' du guié na' bulë'ë, ate' bregui' guié na' guditsjë'. Biti' rizequí'në' nu bönni' inná bé'enë' lë'. ⁵ Ridática'së' ribödxí'ë rëla, en tē dza ga na' nacuá' yeru ba, en gapa naca lu guí'ado', run huë' cuinë' yugu' lu guiöj dzö'ö ni'. ⁶ Cate' bilé'enë' zë'ë zì'tu' Jesús, guxítí'ë guyijë' ga na' zë'ë, ate' buzóa zxibë' lahuë' Lë'. ⁷ Bë'ë zidzaj didza', rë' Jesús:

—¿Bizxi ral-la'a quiu' Jesús, Zxí'inë' Dios nayépisëtërë'? Ni'a queë' Xanru' Dios ráta'yua' lo', bití' usaca' zì'u neda'.

⁸ Caní gunné' bönni' na' tu' chigudxë' Jesús bö' xihui' na':

—Lí', bö' xihui', burúaj lu bönni' ni.

⁹ Jesús gunábinë' le, rnnë':

—¿Bi leu'?

Bubí'i didza' le, gudxi Lë':

—Lea': Le Zián, tu' rö'ö ziantu'.

¹⁰ Gula'nabi yechi' yugu' bö' xihui' na' Jesús para cabí isöl-lë'ë léguequi zì'tu' luyú ni'. ¹¹ Nacuá'aba' cuchí zían lu guí'ado' ní'sö, ta'daba' táguba' ni'.

¹² Gula'nabi yechi' bö' xihui' na' Jesús, ta'nná:

—Gusöl-la' netu' ga ni' dzö'öba' cuchi zián. Bë' netu' lataj tsöjtsú'ugacatu'-ba'.

¹³ La' bë'të' Jesús léguequi lataj, ate' bila'ruáj bö' xihui' na', en yöjtsú'ugaca cuchi zián na', ate' gula'xiti'ba' cuchi zián na', yöjbíxigacaba' ga naca ra' guí'a, yöjcházagacaba' nísado'. Lu nísado' na' gula'yëpiba' nisa, gulátiba', en náacagacaba' ca galaj gayuá'aba'.

¹⁴ Ní'irö bulu'zxunnaj nupa ni' gulún chi'i cuchi zián na'. Yöjtíxjöi'iguequinë' bönachi lu yödzö ni', enca' bönachi nacuá' la' guixi' ni'. Bila'ruáj bönachi lu yödzö, söjyúgaquië' bizxi na' guca ni'. ¹⁵ Cate' bila'dxinë' ga ni' zoë' Jesús, bila'lé'enë' bönni' na' zí'alö yú'ugaca bö' xihui' lë'. Bönni' ni rö'ë ni', nácuë' lari', en zoë' dxí'ado', ate' guladxi bönachi na'. ¹⁶ Nupa na' bila'lé'e le benë' Jesús gula'guíxjöi'i bönachi na' bila'ruáj lu yödzö ca na' guca queë' bönni' na' zí'alö yú'ugaca bö' xihui' lë', enca' ca guca qué'gacaba' cuchi na'. ¹⁷ Ní'irö gula'sí lógaca bönachi zián na' ta'ta'yu lahuë' Jesús urúajë' lu xiyúguequi.

¹⁸ Cate' bubenë' Jesús lë'e bárcodo', bönni' na' zí'alö yú'ugaca bö' xihui' zián lë', gúta'yuë' lahuë' Jesús gu'ë lë' lataj tséajlenë' Lë'. ¹⁹ Jesús biti' bë'ë lë' lataj, pero gudxë' lë':

—Böaj lidxu'. Yöjtíxjöi'i di'a dza quiu' yugu' le zxön bena' quiu' neda', naca' Xanu', en ca bena' buéchi' ládxa' a li'.

²⁰ Söhuöjë' bönni' na', en ruzë' didza' yugu' yödzö Decápolis ca náacagaca le zxön benë' Jesús queë', ate' bulu'bani yúgu'të bönachi nacuá' yugu' yödzö ni'.

Bi'i nigula queë' Jairo, en nigula na' gudannu lari' nácuë' Jesús

(Mt. 9:18-26; Lc. 8:40-56)

²¹ Cate' budxinë' Jesús ia'tsölá'a nísado' na', ní'irö bulu'dubi bönachi zían ga na' zoë' ra' nísado'.

²² Bönni' lë' Jairo, bönni' rinná bë'ë lu yu'u ga tu'dubë' bönni' judío, en nazëdë' queë' Dios, bidë' ga zoë' Jesús. Cate' bilé'enë' Jesús, buzóa zxibë' lahuë', ²³ en gúta'yuë' lahuë', rnnë':

—Chiraqui gátibi' bi'i nigúlado' quia'. Gudá ixóa no'o lëbi' para huóacabi', en bití' gátibi'.

²⁴ Sa'yéajlenë' Jesús lë', ate' bönachi zían sōjácálen Jesús, tu'quirö Lë'. ²⁵ Tu nigula, chinaca chinnu iz ré'enu, zóanu ca' ni'. Biti' ruhu'i rön queënu que huë' quégaca cázanu nigula. ²⁶ Yenni' chigudí'i guzxáca'nu lu ná'agaquië' zían bönni' tu'únë' bönachi. Nítisö chibutönu dëra le dë queënu, tu' cabí bi gúcalen lënu, pero riyali' queënu. ²⁷ Cate' biyöninu tu'i didza' bönachi ca naca queë' Jesús, gudödinu ladjalö bönachi zían na', en bidxinnu zaca' cúdu'lë' Jesús, en gudannu lari' nácuë'. ²⁸ Caní bennu tu' rnnanu: “Channö cansa' le nácuë', huóaca'.” ²⁹ La' bui'itë rön queënu, ate' réquibe'enu chiböácanu que le guca queënu.

³⁰ La' gúquibe'etenë' Jesús ben dxin yöl-la' huáca queë', ate' buécjë', ruyúë' bönachi zían na'. Rnnë':

—¿Nuzxi na' gudán neda'?

³¹ Ní'irö bönni' dá'gaquië' Lë' të' Lë', ta'nnë':

—Rilé'e quézinu' bönachi zían ni tu'quirö Li', en rnnatso': “¿Nuzxi na' gudán neda'?”

³² Ruyúë' Jesús gásibi'ilë' para ilé'enë' nuzxi na' gudán Lë'. ³³ Ní'irö nigula na' gubíga'nu lahuë'. Rádxinu, en rizzízinu tu' chinözinu bi na' guca

queënu, ate' buzóa zxi'binu lahuë' Jesús, en gúdxinu Lë' idútë le nácatë. ³⁴ Jesús rë'ë-nu:

—Nigúlado'. Chiböácu' tu' réajlë'u neda'. Böaj lidxu' idú ládxi'u. Tsaz nuhuöácu' que le guca quiu'.

³⁵ Tsanni ni' ru'ë caní didza' Jesús, bönni' narúajgaquië' lidxë' bönni' na' rinná bë'ë lu yu'u ga tu'dubë' tu'sëdë' queë' Dios bila'dxnë' ni', en të' bönni' na':

—Chigútibi' bi'i nigúlado' quiu'. Bítirö upízxjanu' Bönni' Usedi.

³⁶ Biti' bë' ládxië' Jesús lë na' ta'nnë', ate' gudxë' bönni' unná bë' na', rnnë':

—Biti' gádxinu'. Guyéajlë'ësë' Dios.

³⁷ Biti' bë'ë lataj Jesús tsöjácálen Lë' ia'zíca'rö bönachi, pero légacasë' Pedro, en Jacobo, en Juan, böchë'ë Jacobo na'. ³⁸ Cate' bidxinë' lidxë' bönni' na' rinná bë'ë ga tu'dubë' tu'sëdë' queë' Dios, bilé'enë' raca dzatsa, enca' nupa ni' ta'bödxí, en nupa ta'bödxí yechi'. ³⁹ Guyázië' Jesús, en gudxë' légaquië':

—¿Bizx que rutsátsali', en ribödxili' caní? Biti' nátibi' bi'i nigúlado' ni. Rásisibi' na'.

⁴⁰ Ní'irö bulu'titjë' Jesús, pero Lë' bubéajë' yúgu'të bönachi na' ní'ilö, ate' guchë'ë xuz xiná'abi' bi'i nigúlado' na', enca' nupa nacué'len Lë', ate' guyázië' ga na' dëbi'. ⁴¹ Gudélë'ë ná'abi' bi'i nigúlado' na', en gudxë'-bi':

—Talita, cumi.

Didza' hebreo ni rnna lu didza' xidza': Bi'i nigúlado', guyasa. ⁴² La' guyásatëbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacué' ni'. ⁴³ Ní'irö Jesús gunná bé'enë'

légaquië' cuntu nu ulu'siyönnë' lë na' guca. Gudxë' légaquië':

—Guli'güi' le gágubi' bi'i nigúlado' ni.

6

Ridxinë' Jesús Nazaret, le naca ladzë'

(Mt. 13:53-58; Lc. 4:16-30)

¹ Buzë'ë Jesús ni', budxinë' ladzë', ate' yugu' bönni' dá'gaquië' Lë' sōjácalenë' Lë'. ² Cate' bidxín dza lá'ayi quégaquië' bönni' judío, gusí lahuë' Jesús rusédinë' bönachi ga na' tu'dubë' tu'sëdë' queë' Dios. Gula'cuá' bönachi zían ni' ta'yöni Lë'. Bulu'bani, ta'nná:

—¿Gazxi caz bizédë' bönni' ni yugu' lë ni? ¿Bizxi caz yöl-la' réajni'i ni nadéli'në'? ¿Nacxi caz runë' le nácagaca bë' na' zá'gaca yehua' yubá? ³ Náquië' bönni' ni gubëdxi yaga na', en zxí'ininu María. Náquië' böchi'gaquië' Jacobo, en José, en Judas, en Simón. Nigula zanë' nacuá'lennu ca' rë'u.

Que lë ni na' bulu'cá'anë' Lë' cá'asö. ⁴ Ní'irö Jesús gudxë' légaquië', rnnë':

—Gátitës tunë' bal nu bönni' ru'ë didza' uláz queë' Dios, pero bönachi uládz queë', en bönachi di'a dza queë', en bönachi nacuá' lidxë' biti' tun lë' bal.

⁵ Que lë ni na' biti' guca gunë' Jesús nitú yöl-la' huáca zxön ni'. Bunsë' nabábasö bönachi te'e cate' guxóa në'ë léguequi. ⁶ Bubáninë' Jesús tu' cabí ta'yéajlë' Lë'. Gudödi na' gudödë' yugu' yödzödo' nacuá' gásibi'ilö, rusédinë' bönachi ni'.

Risöl-lë'ë Jesús bönni' dá'gaquië' Lë' tsöjéngaquië' libán

(Mt. 10:5-15; Lc. 9:1-6)

7 Ní'irö bulidzë' Jesús idxínnutë' bönni' dá'gaquië' Lë', en gusí lahuë' risöl-lë'ë légaquië' chopa huéajgaquië'. Budödë' lu ná'agaquië' yöl-la' unná bë' ulu'béajë' yugu' bö' xihui' yú'ugaca bönachi. 8 Gunná bé'enë' légaquië' biti' bi ilu'ë la' nöza, calëga yöxaj, calëga yöta, en calëga dumí biti' ila'gu'ë lu buzudi quégaquië', pero iluá'asë' xiyágado'. 9 Ral-la' ulu'dë'ë xiráchugaquië', pero calëga chopa lari' ulu'xóa yéngaquië'. 10 Gudxë' ca' légaquië':

—Gátitës ga tsú'uli' tu yu'u, guli'sóa yu'u na' cate' uzá'aröli' yödzö na'. 11 Channö tsú'uli' tu yödzö ga biti' ilún bönachi lu yödzö na' libí'ili' bal, en biti' ulu'zë ná'agaquië' xtídza'li', buli'rúaj ni', en buli'quínnaj bëchtö da' lë'e lábali'. Lë ni gaca bë' nabága'gaquië' xíguia'. Le nácatë rea' libí'ili', cate' idxín dza íchúguië' Dios quégaca bönachi, ila'guí'i ila'záca'rö bönachi lu yödzö na' ca ila'guí'i ila'záca' bönachi Sodoma, en Gomorra, yugu' yödzö na' busunítië' Dios.

12 Ní'irö bila'rúajë' bönni' dá'gaquië' Lë', yöjéngaquië' libán ca ral-la' ulu'bí'i ládi'gaca bönachi. 13 Bulu'béajë' zían bö' xihui' yú'ugaca bönachi. Gula'gu'ë le za zían nupa te'e, ate' bulu'huóáquië'.

*Ca bëtigaquië' Juan, bönni' buquilë' bönachi nisa
(Mt. 14:1-12; Lc. 9:7-9)*

14 Biyönnë' Herodes, bönni' unná bë', ca naca le runë' Jesús, tu' rizë didza' gátitës que yöl-la' huáca queë'. Bal-la bönachi ta'nná:

—Chibubanë' Juan, bönni' ni' buquile' bönachi nisa, lu yöl-la' guti. Que lë ni na' napë' yöl-la' huáca runë' yugu' lë ni.

¹⁵ Ia'bal-la bönachi ta'nná:

—Naquië' Elías, bönni' bë'ë didza' uláz queë' Dios dza ni'te.

Ia'bal-la bönachi ta'nná:

—Naquië' bönni' ru'ë didza' uláz queë' Dios ca guláquië' bönni' gulu'ë didza' uláz queë' dza ni'te.

¹⁶ Cate' biyönnë' Herodes yugu' lë ni, gunnë':

—Naquië' Juan, bönni' na' burixa' yenë'. Chibubanë' lu yöl-la' guti.

¹⁷ Caní gunnë' Herodes tu' gusöl-lë'ë lë cazë' bönni' yöjxöngaqië' Juan na', ate' gulúgui'ë lë' du guië lu yu'u lidxi guië. Caní benë' Herodes tu' rilenu Herodías Juan na'. Nácanu nigula na' gúcanu nigula queë' Felipe, böchë'ë Herodes na'. Herodes gudüë'-nu Herodías na', en butsaga ná'alënë'-nu.

¹⁸ Juan na' gudxë' Herodes:

—Biti' ral-la' sóalenu'-nu nigula queë' böchu'u.

¹⁹ Que lë ni na' gusí gurö'önu Herodías. Gú'uninu bi gunnu queë' Juan, tu' gú'uninu gútinu lë', pero biti' bi guzxéqui'nu ²⁰ tu' rádxinë' Herodes Juan. Nözinë' náquië' Juan na' tsahui', en lá'ayi. Que lë ni na' gudapa chi'ë lë', en buzë náguië' lë' idú ládxë'ë sal-la' lë na' rnnë' Juan ben ga gurö'ë böniga Herodes na'. ²¹ Ní'irö bidxín tu dza guzxéqui'nu Herodías na', le naca dza runë' Herodes laní que dza guyé'enë' iz. Bupë'ë le ilë'aj ilahuë' bönni' dë lu ná'agaquië' uláz queë', en bönni' ta'nná bé'enë' bönni' röjáquië' gudil-la, enca' bönni' nácagaquië' lo luyú Galilea. ²² Guyázabi' bi'i nigula queënu Herodías ga na' tē'aj tahuë', en buyá'abi' lógaquië'.

Guyaza ládxë'ë Herodes ca runbi', en gula'yaza ládxi'gaca ca' nupa të'aj tágulen lë'. Ní'irö Herodes gudxë'-bi' bi'i nigula na', gunnë':

—Gunaba bi rë'ënu' gunna' quiu', ate' guna' ca'.

²³ Benë' tsutsu xtídzë'ë, gudxë'-bi':

—Ní'a queë' Xanru' Dios gunna' quiu' bíti'tës bi inabu' ga idxintë gatsaj ga rinná bë'a.

²⁴ Burúajbi' lëbi', ate' gunábabi' xiná'abi':

—¿Bizxi inábatsa'?

Lënu gúdxinu-bi':

—Icjë' Juan, bönni' buquilë' bönachi nisa, inabu'.

²⁵ La' buázatëbi' ga na' zoë' Herodes, en rëbi'-në':

—Rë'ënda' ixú' quia' na'a lu zxiga' zxön icjë' Juan, bönni' na' buquilë' bönachi nisa.

²⁶ Ní'irö buí'innë' Herodes, pero tu' buzötjë' Dios, en tu' bila'yöni ca' nupa tágulen lë', bití' gú'unnë' initi xtídzë'ë na' guzxí' lu në'ë queëbi'.

²⁷ Herodes la' gusöl-la'të' tu bönni' rejë' gudil-la zoë' rapa chi'ë, ate' gunná bé'enë' lë' tsöjxi'ë icjë' Juan. ²⁸ Bönni' na' rejë' gudil-la guyijë' lidxi guié, yöjrixë' yen Juan na', ate' bu'ë icjë', nuxóë' le tu lu zxiga' zxön. Budödë' le lu ná'abi' bi'i nigula na', ate' lëbi' bunödzbabi' le queënu xiná'abi'.

²⁹ Cate' bönni' dá'gaquië' Juan na' bila'yönnë' didza' chiguca lë na', bila'dxinë' ní', en bulu'ú'ë lë', ate' yöjcáchi'gaquië' lë' yeru ba.

*Rugahuë' Jesús zíanrö ca chi-un gayuá' bönachi
(Mt. 14:13-21; Lc. 9:10-17; Jn. 6:1-14)*

³⁰ Gudödi ní' bulu'dübë' bönni' gubáz queë' Jesús ga zoë', en gula'guíxjöi'inë' Lë' yúgu'të le gulunë', en yugu' le bulu'sëdinë' bönachi. ³¹ Nacuá' bönachi

zián ni', nupa zá'gaca, en nupa sōjaca, ga bidx-intē bítirō dē lataj ilahuē' Jesús, en yugu' bōnni' dá'gaquiē' Lē'. Que lē ni na' Jesús gudxē' légaquiē', rnnē':

—Guli'dá. Uyéaj cázaru' ga naca lataj cá'asō, en uzí' lādxi'ru' tu chí'i.

³² La' légacasē' yōjáquiē' tu lē'e bárcodo', ate' bila'dxinē' tu lataj cá'asō. ³³ Bila'lē'e bōnachi zián légaquiē' sōjáquiē' ni', en núnbē'gaca Jesús. Que lē ni na' bōnni' yúgu'tē yōdzō ni' carelō yōjáquiē' ni'. Gula'zē'e ní'agaquiē', ate' bila'dxinē' ni' zí'atēlō ca Jesús, en yugu' bōnni' dá'gaquiē' Lē'. ³⁴ Cate' burúajē' Jesús lē'e bárcodo' na', bilé'enē' bōnachi zián na', ate' buéchi' lādxē'ē légaquiē' tu' nácagaquiē' ca bō'cu' zxíla'do' bití' zoa nu gapa chí'i légacaba'. Gusí lahuē' rusēdinē' légaquiē' le zián. ³⁵ Cate' chiridzō' dza na', yugu' bōnni' dá'gaquiē' Jesús bila'dxinē' ga zoē', en tē' Lē':

—Chiridzō', ate' lataj cá'asō naca ni. ³⁶ Busöl-la' bōnachi zián ni para tsōjaca yugu' yú'udo', en yugu' yōdzōdo' nacua' gāsibi'ilō, tsōjō'ugaca yōta, tu' cabí bi dē ni le ilagu.

³⁷ Bubi'ē didza' Jesús, gudxē' légaquiē':

—Guli'güí' libí'i cázali' le ilahuē'.

Gulē' Lē':

—¿Naru' tsōjō'utsatu' yōta xtila len lāzxjatu' que idú xunu' beo', ate' güí'itu' le ilahuē'?

³⁸ Jesús gudxē' légaquiē':

—¿Bal-laxi yōta xtila dē queēli'? Guli'tsōjyútsōca'. Cate' chinōziguequinē', tē' Lē':

—Gáyu'sō yōta xtila dē, en chópasōba' bōla dēba'.

³⁹ Ní'irō gunná bē'ē Jesús ilunē' ga ila'bō' bōnachi zián na', ila'cuá' tu cō' huéajguequi ga naca lachi'

lu daca'. ⁴⁰ Gula'cu'ë tu cö' huéajgaquië', tu gayuá' huéajgaquië', en chi-un huéajgaquië'. ⁴¹ Ní'irö gudélë'ë Jesús igáyu'të yöta xtila na', en irópaba' böla na'. Buyüë' zaca' lúzxiba, en gudxë' Dios: "Xclenu'." Ní'irö buzzuxxjë' yöta xtila na', en bë'ë quégaquië' bönni' usëda queë' para ila'guísië' quégaca bönachi zían na'. Gudísië' ca' irópatëba' böla na' quégaca yúgu'të bönachi na'. ⁴² Gulahuë' yúgu'të', en bulu'huóljanë'. ⁴³ Ní'irö bulu'tubë' le bizxaj que yöta xtila na', en quégacaba' böla, ate' chinnu ga'böra bulu'lié'. ⁴⁴ Guláquië' ca chi-un gáyu'ë bönni' na' gulahuë'.

Rizë'e ni'ë Jesús lu nísado'
(Mt. 14:22-27; Jn. 6:16-21)

⁴⁵ La' bentë' Jesús ga gula'benë' yugu' bönni' dá'gaquië' Lë' lë'e bárcodo', para ila'nóruë' lahuë', ila'dödë' lu nísado' na', para ila'dxinë' lu yödzö Betsaida, tsanni ni' Lë' rusöl-lë' bönachi zían na' lídxiguequi. ⁴⁶ Cate' chibudxi busöl-lë' légaquië', guyijë' tu lu guí'ado', ate' ni' ruí'ilenë' Dios didza'. ⁴⁷ Cate' chizá' ral-la, zeaj bárcodo' na' gatsaj láhui'lö nísado', ate' zoë' Jesús tuzë' luyú bidxi na'. ⁴⁸ Bilé'enë' Jesús légaquië', böniga tu'së'ë bárcodo' na' tu' recja bö' za' ga na' ta'dödë'. Gudödi guluhuëla bidxinë' Jesús ga na' nacu'ë, rizë'e ni'ë lu nísado' na', ate' gú'unnë' tódise' ga na' nacu'ë. ⁴⁹ Cate' bila'lé'enë' Lë' rizë'e ni'ë lu nísado', guléquinë' bixín na', ate' gula'bödxí'ë ⁵⁰ tu' bila'lé'enë' yúgu'të' Lë', en guladxi gula'dzöbinë'. Ní'irö la' bulidztë' Jesús légaquië', rnnë':

—Buli'tipa ládxi'li'. Neda' caz. Biti' gádxili'.

⁵¹ Gurenë' Jesús lë'e bárcodo' ga na' nacu'ë, ate' gurö'ö dxi bö' na' recja, ate' légaquië' gula'niti gula'tíqui'sinë' bulu'báninë'. ⁵² Biti' ta'yéajni'ininë' le rulu'i lë na' benë' Jesús que yöta xtila na'. Ni' naca zidi icja ládxi'do'gaquië'.

*Ruúnë' Jesús nupa te'e lu yödzö Genesaret
(Mt. 14:34-36)*

⁵³ Gula'dödë' Jesús, en yugu' bönni' dá'gaquië' Lë' ia'tsölá'a nísado', ate' bila'dxinë' ga naca lu xiyúgaca bönachi Genesaret. Bulu'dxíguë'ë bárcodo' luyú bidxi ni'. ⁵⁴ Cate' bulu'rúajë' lë'e bárcodo' na', la' bulu'únbë'të bönachi ni' Jesús. ⁵⁵ Gula'xiti' bönachi na', yöjaca yúgu'të yödzödo' idú gásibi'ilö, en gula'sí lógaquië' dujuá'agaquië' yúgu'të nupa te'e ga zoë' Jesús, zxóagaca yugu' le déguequini, ate' bila'dxinë' gátitës ta'yönnë' zoë' Jesús. ⁵⁶ Gátitës ga ridödë' Jesús, yugu' lu yödzödo', en yugu' yödzö zxön, en yugu' yú'udo', tu'cu'ë nupa te'e quégaquië' gapa naca la' nöza, en gapa naca lu yë'ëyi, en ta'tá'yuë' lahuë' Jesús gu'ë légaquië' lataj ila'gansë' luzxi lari' nácuë'. Yúgu'të nupa na' bila'gán lari' nácuë' bulu'huóácatë dxí'ado'.

7

*Le tunga biti' nácgaca bönachi tsahui' lahuë' Dios
(Mt. 15:1-20)*

¹ Ní'irö bal-lë' bönni' yudo' fariseo len bal-lë' bönni' yudo' usedi narúajgaquië' Jerusalén, bulu'dubë' ga zoë' Jesús. ² Bönni' yudo' ni bila'lé'enë' bönni' usëda queë' Jesús tahuë' yöta, biti' nuchí'agaquië' ná'agaquië', lë na' rnna: Biti' nayárigaca ca nalëbiguequinë' tunë' bönni' yudo'

na'. Que lë ni na' gula'nnë' quégaquië'. ³ Yugu' bönni' yudo' fariseo na', en ia'zica'rö bönachi judío tunë' ca gulëbiguequinë' gulunë' xuz xtó'ogaquië', ate' channö cabí ta'guíbi ná'agaquië' zían luzuí ca na' nalëbiguequinë' tunë', bití' ca' tahuë'. ⁴ Cate' tu'dxinë' röjõ'ugaquië' lu yë'ëyi, channö cabí ta'guibë' lë na' ca nalëbiguequinë' tunë', bití' ca' tahuë'. Zíanrö ca' tunë', yugu' le nalëbiguequinë' tunë'. Caní ta'guibë' zxiga' yõ'öna, en yugu' zxiga' guié, en yugu' le táti'në'. ⁵ Que lë ni na' yugu' bönni' yudo' fariseo, en yugu' bönni' yudo' usedi gula'nábinë' Jesús, ta'nnë':

—¿Naru' cabí tunë' yugu' bönni' usëda quiu' ca gulëbiguequinë' gulunë' xuz xtó'oru', però tahuë' yõta bití' nuchí'agaquië' ná'agaquië'?

⁶ Bubi'ë didza' Jesús, rë' légaquië':

—Libí'ili', bönni' ruluí'isö tsahui' cuinli'. Nácatë le gudíxjö'ë Isaías, bönni' ni' bë'ë didza' uláz queë' Dios, ca naca queëli'. Buzúajë' lu guichi, gunnë': Yugu' bönni' ni, len rú'agacasë' tunë' neda' bal, calëga idú ládxi'gaquië'.

⁷ Níti'sö naca yöl-la' ba ta'gu'ë neda' tu' tu'sëdinë' le ta'nná bë' bönachi, calëga xibá quia'.

⁸ Caní naca, tu' rucá'anali' le gunná bë'ë Dios, ate' runli' yugu' le nazí láchuili' lu ná'agaca bönachi.

⁹ Gudxë' ca' légaquië':

—Idú ládxi'li' rucá'anali' cá'asö le gunná bë'ë Dios para gunli' ca naca le nulaga loli' runli'.

¹⁰ Moisés gunnë' caní: “Ben bal xuz xinó'o.” Gunnë' ca': “Nu ulidza zi' xuzi o xinë'e, guli'gútité nu na'.” ¹¹⁻¹² Libí'ili' rnnali' caní: “Channö nu bönni' guié' xuzë' o xinë'ë: Bití' gaca bi gunna'

queëli', tu' naca Corbán." (Didza' ni rnna lu didza' xidza': Tu' nuzóa' quez queë' Dios yúgu'të.) Ní'irö rnnali': "Biti' run bayudxi bi gunë' bönni' na' quégaquië' xuz xinë'ë." ¹³ Caní naca, rucá'anali' cá'asö xtídzë'ë Dios para gunli' le nulaga loli' runli', yugu' le rudödili' lu ná'agaca zxi'ini xi'sóali'. Ziánrö ca' le caní runli'.

¹⁴ Ní'irö Jesús bulidzë' bönni' zián na' nacu'ë ni', en rë' légaquië':

—Guli'zë nágali' didza' gu'a, yúgu'tëli', en guli'tséajni'i. ¹⁵ Biti' bi dë le riyaza nu bönni' le gaca gun ga biti' náquië' tsahui' lahuë' Dios, pero le rirúaj lë', lë ni gaca gun ga biti' náquië' tsahui' lahuë' Dios. ¹⁶ Channö zoa nágali', en riyönili', buli'zë nágali'.

¹⁷ Cate' Jesús bulá'alenë' bönachi zián na', guyu'ë tu yu'u, ate' yugu' bönni' usëda queë' gula'nábinë' Lë' ca naca lë na' bucúdu'ë didza'. ¹⁸ Jesús gudxë' légaquië':

—¿Riyádzjatsö ca' queëli' yöl-la' réajni'i? ¿Naru' cabí réajni'ili', yúgu'të le riyaza nu bönni', biti' gaca gun ga biti' náquië' tsahui' lahuë' Dios? ¹⁹ Naca caní tu' cabí riyaza icja ládxi'da'ahuë', pero lë'ësë' riyaza, ate' rurúaj lë'ë.

Tu' gunnë' caní Jesús, buluí'inë' rë'u naca dxi'a yúgu'të le rë'aj ráguru'. ²⁰ Gunnë' ca' Jesús:

—Le rirúaj lu bönni' run ga biti' náquië' tsahui' lahuë' Dios. ²¹ Caní naca, tu' ta'rúaj icja ládxi'do'gaquië' bönni' yugu' le ta'zá ládxi'gaquië' le naca xihui', yugu' le tun ga tunë' dul-la' ta'guitsjë' xibá que yöl-la' nutsaga na', en yugu' le ruá' dö'. Tun ga tútië' bönachi, ²² en ta'banë',

en ta'zě ládxi'gaquië' le dē que luzá'agaquië', en tu'ě dō', en ta'zī' yě'ě, en tu'zxě'ě, en ta'nná zi'ě que luzá'agaquië', en tun ba zxön cuíngaquië', en tuně' le canōz. ²³ Yúgu'tě le xihui' caní ta'rúaj icja ládxi'da'ahuë' nu bōnni', en tun ga biti' náquië' tsahui' lahuë' Dios.

*Tu nigula izá'a réajlě'ěnu Jesús
(Mt. 15:21-28)*

²⁴ Buzě'ě Jesús ni', ate' bidxině' gala' ga nacuá' yōdzō Tiro, en yōdzō Sidón. Guyáziě' tu yu'u ni', en gú'unně' cuntu nu inōzi, pero biti' ca' guca ucachi' cuině'. ²⁵ Tu nigula zóabi' bi'i nigúlado' queěnu, yu'u bō' xihui' lěbi', biyōninu didza' rizě ca naca queě' Jesús, ate' la' bídatěnu ga zoě' Jesús, en buzóa zxíbinu xini'ě. ²⁶ Nigula ni biti' nácanu judío, pero nabábanu bōnachi Sirofenicia. Gúta'yunu lahuë' Jesús ubéajě' bō' xihui' na' yu'u-bi' bi'i nigúlado' queěnu. ²⁷ Ní'irō Jesús gudxě'-nu, rnně':

—Bě' lataj ulu'huōlaj zí'alō nupa nácagaca ca zxí'ini xan yu'u, tu' cabí naca dxi'a ugúaru' yōta quégacabi' bi'i na', en chú'unaru' le lógacaba' bō'cu'do'.

²⁸ Bubí'inu didza' nigula na', gúdxinu Jesús:

—Ōn, Xan, pero yugu' bō'cu'do' nacuá'aba' zxani ga tágubi', táguba' le bizxaj tu'huōxaj ga na' tágubi'.

²⁹ Ní'irō Jesús gudxě'-nu, rnně':

—Tu' gunnó' caní, huáca huōaju'. Chiburúaj bō' xihui' na' guyú'u-bi' bi'i nigúlado' quíu'.

³⁰ Cate' budxinu lídxiu, bilé'enu-bi' bi'i nigúlado' queěnu na', dēbi' lu da'a, en chinurúaj bō' xihui' na' guyú'u lěbi'.

Jesús ruúnē' tu bōnni' nacōdzue', en biti' gaca innē'

³¹ Burúajē' Jesús lataj na' nababa yōdzō Tiro, ate' gudōdē' gapa dē yōdzō Sidón, en yugu' yōdzō Decápolis, ate' bidxinē' ra' nísado' lu xiyú Galilea.

³² Bōnachi ni' dujuá' gaca tuē' bōnni' nacōdzue', en biti' raca innē' ga zoē' Jesús, ate' ta'ta'yu lahuē' Jesús ixóa nē'ē lē'. ³³ Jesús bubéajē' lē' tsölá'alō ladjagaca bōnachi na', ate' bunē'ē xibōn nē'ē yeru náguiē' bōnni' na'. Gurú'unē' zxōna'do', en gudanē' lúdxē'ē. ³⁴ Ní'irō buyúē' lúzxibálō, en gunné lúdxē'ē, rnnē':

—Efata.

Didza' hebreo ni rnna lu didza' xidza': Guyalaj.

³⁵ La' bōáljatē náguiē', en la' buguítjatē lúdxē'ē, en gunnētē' dxí'ado'. ³⁶ Jesús gunná bé'enē' légaquiē' cuntu nu ilē' ca', pero tsca gunná bé'enē' légaquiē', bulu'zētērē' ca' didza' que lē na' benē'.

³⁷ Bulu'bánnē', ta'nnē':

—Tsáhui'do' runē' yúgu'tē. Runē' ga tu'yōni nupa gulaca cōdzu, en ga tuí'i didza' nupa biti' guca ila'nnē.

8

Rugahuē' Jesús ziánrō ca choá' gayuá' bōnachi (Mt. 15:32-39)

¹ Yugu' dza na' bulu'dubi bōnachi zián ga zoē' Jesús. Tu' cabí dē le ilágugaca, Jesús bulidzē' bōnni' usēda queē', ate' bē'lenē' légaquiē' didza'. ² Gudxē' légaquiē':

—Ruhuechi' ládxa'a bōnachi zián ni tu' chinaca tsonna dza nacuá'len neda' ni, en biti' dē le ilágugaca. ³ Channō usöl-la'a léguequi lúdxigaca

ta'dunsö ca', huala'cuídi' la' nöza, tu' zá'gaca zi'tu' bál-lagaca.

⁴ Bulu'bi'ë didza' bönni' usëda queë', tē' Lē':

—¿Bizxi ugágutsaru' bönachi guizxi yu ni, ga ni naca lataj cá'asö?

⁵ Gunábinē' Jesús légaquiē', rnnē':

—¿Bál-laxi yöta xtila dē queëli'?

Tē' Lē':

—Gádxisö.

⁶ Ní'irö Jesús gunná bé'enē' bönachi zían na' ila'bö' lu yu. Gudélē'ë gadxi yöta xtila na', ate' gudxē' Dios: "Xclenu'." Ní'irö buzzuxjē' léguequi, en bē'ë quégaquiē' bönni' usëda queë' para ila'guísiē' lógaca bönachi zían na'. ⁷ Guta' ca' quégaquiē' tu chópaba' böla cuidi'. Jesús gudxē' Dios: "Xclenu'", ate' gunná bé'enē' légaquiē' ila'guísiē' ca' légacaba' lógaca bönachi. ⁸ Gulagu yúgu'tē bönachi na', en bulu'huölaj. Ní'irö bulu'tubē' le bizxaj nagá'anagaca, ate' gula'lí idú gadxi ga'böra. ⁹ Bönachi na' gulagu gulaca idú ca choá' gayuá'gaca. Jesús busöl-lē' léguequi lídxigaca, ¹⁰ ate' gurenē' lē'e bárcodo' tsözxön len yugu' bönni' usëda queë', ate' bila'dxinē' lu xiyúgaca bönachi Dalmanuta.

Ta'nábinē' Jesús gunē' tu le gaca bē' nuzxi náquiē' (Mt. 16:1-4; Lc. 12:54-56)

¹¹ Ní'irö bila'dxinē' bönni' yudo' fariseo ga zoē' Jesús, en gula'sí lógaquiē' ta'díl-lalenē' Lē' didza'. Gulē'ënnē' ila'zí' bē'ë Jesús. Que lē' ni na' gula'nábinē' Lē' gunē' tu le naca bē' za' yehua' yubá. ¹² Gunnēda' ládxē'ë Jesús, rnnē':

—¿Bizx que ta'nábitsö bönachi ni neda' guna' tu le naca bē' za' yehua' yubá? Le nácatē rea' libí'ili', bití' ca' ilé'eli' tu le naca bē' za' yehua' yubá.

¹³ Ní'irö bulá'alenē' légaquiē'. Bubenē' lē'e bárcodo', en sa'yéajē' ia'tsölá'a nísado'.

Le tu'sēdinē' bönni' yudo' naca ca' cúa zi que yōta xtila

(Mt. 16:5-12)

¹⁴ Gulal-la lādxi'gaquiē' bönni' usēda queē' Jesús ilu'ē bi ilahuē', ate' tuz yōta xtila dē lē'e bárcodo' na'. ¹⁵ Ní'irö Jesús buzéajni'inē' légaquiē', rnnē':

—Bulí'yútsöca' queēli'. Guli'gún chí'i cuinli' para cabí'sí'ili' le naca ca' cúa zi que yōta xtila quégaquiē' bönni' yudo' fariseo, en queē' Herodes.

¹⁶ Gula'sí lógaquiē' tu'ē didza' bönni' usēda queē' la' légacasē', ta'nnē':

—Gunnē' caní tu' cabí dē yōta xtila gáguru'.

¹⁷ Réquibe'enē' Jesús le ta'nnē', ate' rē' légaquiē':

—¿Bizx que ruí'ili' caní didza' tu' cabí dē yōta xtila gáguru'? ¿Naru' cabí réajni'itseli', en bití' réquibe'itseli'? ¿Ni nácatsö zidi icja lādxi'do'oli'?

¹⁸ ¿Zóatsö guiōj loli', en bití' rilé'eli', en zóatsö guídi nágali', en bití' riyōnili'? ¿Naru' cabí rōjnétseli'?

¹⁹ Cate' ni' buzuxzja' gayu' yōta xtila, ate' gu-lahuē' chi-un gáyu'ē bönni', ¿bál-laxi ga'bōra bulili' le bizxaj butúbili'?

Gula'nnē':

—Chinnu.

²⁰ Gunnē' ca' Jesús:

—Cate' ni' buzuxzja' gadxi yōta xtila, ate' gu-lagu choá' gayuá' bönachi, ¿bál-laxi ga'bōra bulili' le bizxaj butúbili'?

Gula'nnē':

—Gadxi.

²¹ Ní'irö Jesús gudxë' légaquië':

—¿Naru' cabí réajni'itseli' na'a, bë'a didza' que le tu'sëdinë' bönni' na'?

Jesús ruúnë' bönni' Betsaida nachul-la lahuë'

²² Cate' Jesús, en bönni' dá'gaquië' Lë' bila'dxinë' yödzö Betsaida, bila'dxín ga zoë' Jesús nupa dujuá'gaquië' queë' tu bönni' nachul-la lahuë'. Ta'tá'yüë' lahuë' canë' bönni' na'. ²³ Jesús gudélë'ë në'ë bönni' na' nachul-la lahuë', ate' guchë'ë lë' ní'ilö ra' yödzö. Ní' budxië' zxöna' guiöj lahuë', en guxóa në'ë lë'. Ní'irö gunábinë' lë', rnnë':

—¿Ba rilé'enu' lati'?

²⁴ Buyüë' bönni' na' nachul-la lahuë', rnnë':

—Rilé'egacada' bönachi, nalá'gaca ca yugu' yaga, pero ta'dá bönachi na'.

²⁵ Leyúbölö guxóa në'ë Jesús guiöj lahuë', ate' buyüdë'ë bönni' na' nachul-la lahuë', ate' böácatë dxí'ado' guiöj lahuë'. Na'a rilé'enë' dxí'ado' yúgu'të. ²⁶ Ní'irö Jesús gusöl-lë'ë lë' lidxë', rnnë':

—Biti' tsöjdödu' lahui' yödzö, en cuntú nu guío' le bena' nu zoa lu yödzö ní.

Rnnë' Pedro: "Jesús náquië' Cristo"

(Mt. 16:13-20; Lc. 9:18-21)

²⁷ Gudödi na', bulu'zë'ë Jesús, en yugu' bönni' usëda queë' ní', ate' gula'dödë' yugu' yödzödo' nabábagaca Cesarea, ga na' rinná bë'ë Filipo. Tsanni ní' yú'ugaquië' nöza, Jesús rinabi yudxë' yugu' bönni' usëda queë', rnnë':

—¿Nuzxi ta'nná bönachi naca'?

²⁸ Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquile' bönachi nisa. Ta'nná ia'bal-la nacu' Elías, bönni' bë'ë didza' uláz queë' Dios dza ni'te. Ta'nná ia'bal-la nacu' bönni' yúbölö bë'ë didza' uláz queë' Dios dza ni'te.

²⁹ Ní'irö Jesús gunábinë' légaquië', rnnë':

—Nazxi libí'ili', ¿nuzxi rnnali' naca'?

Bubi'ë didza' Pedro, rnnë':

—Li' nacu' Cristo.

³⁰ Ní'irö Jesús gunná bé'enë' légaquië' cuntú nu ulu'siyönnë' Nu náquië'.

Rigúxjö'ë Jesús ca si' ilútië' Lë'

(Mt. 16:21-28; Lc. 9:22-27)

³¹ Ní'irö gusí lahuë' Jesús rusëdinë' bönni' dá'gaquië' Lë', rnnë':

—Run bayudxi qui'i saca'a neda', Bönni' Guljë' Bönachi. Bönni' gula tu'zéajni'inë', en yugu' bixúz unná bë', en bönni' yudo' tu'sëdinë' ulu'zöë' neda' tsölá'alö. Ilútië' neda', pero cate' gaca tsonna dza ubana'.

³² Yálajsö bë'lenë' légaquië' didza' ni. Ní'irö Pedro guchë'ë Jesús tsölá'alö, en gusí lahuë' ridil-lë' lë' didza'. ³³ Buécjë' Jesús, en buyúë' ia'zica'rë' bönni' usëda queë', ate' buzenë' bach Pedro, rnnë':

—Gucuita ga zoa'. Nacu' ca Satanás, tu' xihui'. Le rizá' ládxu'u bití' za' lu në'ë Dios, pero ca ta'zá' ládxi'gaca bönachi naca.

³⁴ Ní'irö Jesús bulidzë' yugu' bönni' usëda queë', enca' bönachi nacua' ni', en gudxë' légaquië':

—Channö rë'enë' nu bönni' tē'ë neda', ral-la' uzöë' tsölá'alö le rë'ëni quézinë', en gáquië' ca tu bönni' sa'yéajë' sōjtë'ë lë'e yaga cruz, ate' ní'irö huáca tē'ë neda'. ³⁵ Nu bönni' ruí'ida' ládxë'ë

yöl-la' na'bán queë', unítie' le, pero nu bönni' unítie' yöl-la' na'bán queë' tu' dë'ë neda', o tu' dë'ë didza' dxi'a quia', udéli'në' bönni' ni yöl-la' na'bán queë'. ³⁶ ¿Naru' uzi'tsë' xibé tu bönni' channö utubë' yúgu'të le dë yödzülió ni, pero uniti cuinë'? ³⁷ Biti' bi gaca unödzejë' tu bönni' le huöá'ui cuinë'. ³⁸ Channö zoë' nu bönni' rutu'ínë' quia' neda', en que xtídza'a lógaca bönachi ni nucá'anagaca Dios, en tun dul-la', lësca' caní neda', Bönni' Guljë' Bönachi, utu'ida' queë' bönni' na' cate' guídalena' yöl-la' huáca zxön queë' Xuza', ate' dzágagaquie' gubáz lá'ayi neda'.

9

¹ Jesús gudxë' ca' légaquie', rnnë':

—Le nácatë rea' libí'ili', nacuá' ni nupa bití' ilátigaca cate' ila'lé'erö idinná bë'ë Dios luyú ni, en ilá' lahui yöl-la' huáca zxön queë'.

*Ridzá'a ca riná' lahuë' Jesús
(Mt. 17:1-13; Lc. 9:28-36)*

² Cate' chigudödi xopa dza, Jesús guchë'ë Pedro, en Jacobo, en Juan, ate' légacasë' yöjáquie' tu lu guí'a sibi. Ni' bidzá'a ca riná' lahuë' Jesús lógaquie' yonnë' na'. ³ Guyëpi yösa bení' lari' nácuë' Jesús, ate' guca chiguíchido'os. Zxíla'do'os guca, le cuntú nu ra' lari' yödzülió ni gaca gun chiguíchido'os ca guca lari' na'. ⁴ Bulu'lu'í lógaquie' Elías, en Moisés, tu'ilenë' Jesús didza'. ⁵ Ní'irö Pedro gudxë' Jesús:

—Bönni' Usedi, bica' ba rë'u zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

⁶ Caní gunné' Pedro tu' cabí nõzinë' bi na' rnnë', tu' tádxinë' bönni' usëda queë' Jesús na'. ⁷ Ní'irö gurö'ö böaj le gulú'u zxul-la légaquië', ate' biyõn chi'i nu ruí'i didza' lu böaj na', rnna:

—Bönni' ni Zxí'ina'. Nadxí'ida' Lë'. Buli'zë nágali' Lë'.

⁸ La' bulu'yutë' pero cúnturö nu ta'lé'enë'. Tuzë' Jesús zóalenë' légaquië'.

⁹ Tsanni ni' yú'ugaquië' nõza, tu'dínnië' lu guí'a sibi na', Jesús gunná bé'enë' légaquië' cuntu nu ulu'siyönnë' ca', lë na' bila'lé'enë', cate' ubanrë' lu yöl-la' guti Lë', Bönni' Guljë' Bönachi. ¹⁰ Que lë ni na' gula'gú'usë' ícjagaquië' didza' ni bë'ë, ate' la' légacasë' ta'nabi yúdxinë' luzá'agaquië' bizxi sa'yéaj didza' na' bë'ë, gunné' ubanë' lu yöl-la' guti.

¹¹ Gula'nábinë' Jesús, ta'nnë':

—¿Bizx que ta'nnë' bönni' yudo' usedi run bayudxi guídë' Elías zí'alö ca guídë' Cristo?

¹² Bubi'ë didza' Jesús, rnnë':

—Le nácatë guídë' Elías zí'alö, en ucu'ë yúgu'të ca ral-la' gaca. Na'a, ¿bizxi sa'yéaj le nazúaj lu guichi rnna run bayudxi qui'i sáquë'ë Bönni' Guljë' Bönachi, ate' cá'asö ulu'cá'ana bönachi Lë'? ¹³ Rea' libí'ili': Chibidë' Elías, ate' gulunë' queë' tsca gulë'ënnë', tsca nazúaj lu guichi lá'ayí ca ral-la' gaca queë'.

Jesús ruúnë'-bi' bi'i bönni' yu'u lëbi' bö' xihui'

(Mt. 17:14-21; Lc. 9:37-43)

¹⁴ Cate' ni' bulu'dxinë' Jesús, en bönni' dzágagaquië' Lë' ga na' nacu'ë ia'zica'rë' bönni' usëda queë' Jesús, bila'lé'enë' nacuá' bönachi zían ni', ate' bönni' yudo' tu'sëdinë' ta'díl-lalenë' yugu'

bönni' usëda queë' na' didza'. ¹⁵ Cate' bönachi zián na' bila'lé'e Jesús, bulu'bani, en carelō zā'gaca ga na' zē'ë, dijödxi gaca Lë': "Padiux."

¹⁶ Ní'irō Jesús gunábinë' yugu' bönni' usëda queë' na', rnnë':

—¿Bizxi didza' na' ridíl-lalenli' légaquië'?

¹⁷ Bubi'ë didza' tu bönni' nùtsë'ë ladaj bönachi zián na', rnnë':

—Bönni' Usedi, nachë'a-bi' bi'i bönni'do' quia' ni quiu', yu'u lëbi' bö' xihui' le run ga biti' raca innëbi'.

¹⁸ Cate' bö' xihui' na' ru'u lëbi', rurixi rutula lëbi' lu yu, ate' ribía bidxina' zidi' ruá'abi', en rutil-la láya'bi'. Que lë ni na' zeaj ridxítabi'. Gunábigacada'në' bönni' usëda quiu' ulu'béajë' bö' xihui' na', pero biti' gula'zéqui'në'.

¹⁹ Bubi'ë didza' Jesús, rnnë':

—Libi'ili', bönni' cabí ta'yéajlë'ë. ¿Gáca'xte caz ral-la' sóalena' libí'ili'? ¿Gáca'xte caz ral-la' guá ilena' queëli'? Guli'diguá'-bi' quia' ni.

²⁰ Dujuá'agaquië'-bi' ga na' zoë' Jesús. Cate' bö' xihui' na' bilé'e Lë', la' buxízitë lëbi'. Gudzö'öbi' lu yu, ate' burixi butula lëbi', ate' bidxía bidxina' zidi' ruá'abi'. ²¹ Ní'irō Jesús gunábinë' xúzibi' bi'i na', rnnë':

—¿Gáca'xi chiguca raca caní queëbi'?

Rnnë' xúzibi' na':

—Ni' nácatëbi' bí'ido' ré'ebi' caní. ²² Zián luzuí rirú'una lëbi' lu guí', en lu nisa para guti lëbi'. Que lë ni na', channō racu' lati', buéchi' ladxi' netu', gácalenu' netu'.

²³ Jesús gudxë' lë':

—Channō huáca tséajlë'u, yúgu'të huáca channō tséajlë'u Dios.

24 La' bē'tē' zidzaj didza' xúzibi' bi'i na', rnnē':

—¡Réajlě'a! ¡Gúcalen neda' para tséajlě'ëra' Lě'!

25 Cate' bilé'enē' Jesús zá'gaca bönachi zían, tu'quí Lě', buzenē' bach bö' xihui' na', rē' le:

—Li', bö' xihui' runu' ga bití' raca inná, en bití' raca yōni bönachi, rinná bé'eda' li' uruju' lu bi'i ni, en bítí'rō tsu'u lēbi'.

26 Gurōdxi'a bö' xihui' na', en burixi butúlada' bi'i na'. Ní'irō burúajtē, en bucá'ana bi'i na' ca bi'i nati cázabi'. Ca' naca, guluí'i didza' bönachi zían ni', ta'nná:

—Chinátibi'.

27 Ní'irō Jesús gudélě'ë ná'abi', en buchisē'-bi', ate' guzuíbi' bi'i na'.

28 Ní'irō guyáziē' Jesús tu yu'u, ate' la' légacasē' gula'nábinē' bōnni' usēda queē' Lě', ta'nnē':

—¿Bizx que bití' guca ubéajtu' netu' bö' xihui' na'?

29 Jesús gudxē' légaquiē':

—Bití' gaca ubéajli' cá'asō bö' xihui' caní, pero tuz channō ulídzali'-nē' Dios, en gunli' gubasa.

Jesús rigúíxjō'ë leyúbölö ca si' ilútiē' Lě'

(Mt. 17:22-23; Lc. 9:43-45)

30 Cate' bulu'zē'ë Jesús, en yugu' bōnni' dá'gaquiē' Lě' ni', gula'dödē' luyú Galilea. Bití' ré'ënē' Jesús nu inōzi ga na' zoē' 31 tu' rusédinē' yugu' bōnni' usēda queē'. Rē' légaquiē':

—Ulu'dödē' neda', Bōnni' Guljē' Bönachi, lu ná'agaquiē' bōnni' ilútiē' neda', pero tōdi gátia', cate' gaca tsonna dza ubana'.

32 Bití' gula'yéajni'inē' didza' ni rē' légaquiē', ate' tu' tádxinē', bití' bi gula'nábinē' Lě'.

*Nu naca lo**(Mt. 18:1-5; Lc. 9:46-48)*

³³ Ní'irö Jesús, en bönni' dá'gaquië' Lë' bila'dxinë' yödzo Capernaum, ate' tsanni ni' nacu'ë lu yu'u, Jesús gunábinë' légaquië', rnnë':

—¿Bizxi didza' na' gudíl-lalen luzá'ali' cate' ni' yú'uli' nöza?

³⁴ Légaquië' bulu'sayaj rú'ugaquië', tu' gula'díl-lalen luzá'agaquië' didza' la' nöza ni' núzxilögaquië' gáquië' bönni' lo. ³⁵ Ní'irö gurö'ë Jesús, en bulidzë' idxínnutë' bönni' usëda queë'. Rë' légaquië':

—Nu rë'ëni gaca lo ral-la' gaca ca tu bönni' cuíd'sö, enca' ca ni'a ná'ali' yúgu'tëli'.

³⁶ Ní'irö Jesús gudélë'ë-bi' tubi' bí'ido', en buzóë'-bi' gatsaj láhui'lö ga na' nacu'ë. Ni' runidë'-bi', rë' légaquië':

³⁷ —Nu bönni' si' lu në'ë tu bí'ido' caní tu' néquibi' quia', si' lu në'ë ca' neda', ate' nu bönni' si' lu në'ë neda', calëga néda'sö si' lu në'ë, pero si' lu në'ë ca' Xuza', Bönni' na' nasöl-lë'ë neda'.

*Nu bití' ridá'baga' rë'u, rácalen rë'u**(Mt. 10:42; Lc. 9:49-50)*

³⁸ Ní'irö Juan gudxë' Jesús:

—Bönni' Usedi, bilé'etu'-në' tu bönni' rubéajë' yugu' bö' xihui', rugunë' dxin lo'. Gunná bé'etu' lë' bíti'rö gunë' ca', tu' cabí dë'ë rë'u.

³⁹ Ní'irö Jesús gudxë' lë':

—Biti' inná bé'eli'-në', tu' channö zoë' nu bönni' runë' tu yöl-la' huáca le za' yehua' yubá, en rugunë' dxin La' neda', bití' ca' gaca bönni' na' innë' zì'ë quia'. ⁴⁰ Caní naca, nu bití' ridá'baga' rë'u, rácalen nu na' rë'u. ⁴¹ Núti'tës nu gunna queëli' tu zxíga'do'

nisa guí'jali' tu' dá'ali' neda', Cristo, si'i caz nu na' le ral-la' gata' que.

Zoa bönadxi queëru' gunru' ga nu gun dul-la'
(Mt. 18:6-9; Lc. 17:1-2)

⁴² Gunnë' ca' Jesús:

—Núti'tës nu gun ga gunbi' dul-la' tubi' bí'ido' caní réajlë'ëbi' neda', gácarö dxi'a ugal-la' nu na' guichi riyëtu yaga yeni, en tsöjchú'una cuini lu nísado'. ⁴³ Channö tu no'o gun ga gunu' dul-la', guchugu le. Dxi'arö gaca quiu' tsöjtsáziu' ga su' ibanu' zoa tuz no'o, calëga zoa chopá no'o, ate' tsöjtsáziu' lu guí' gabila, ga ni' biti' ulu guí' que.

⁴⁴ Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu. ⁴⁵ Lësca' caní, channö tu ni'u gun ga gunu' dul-la', guchugu le. Gácarö dxi'a quiu', tsöjtsáziu' ga su' ibanu' zoa tuz ni'u, calëga zoa chopá ni'u, ate' tsöjtsáziu' lu guí' gabila, ga ni' biti' ulu guí' que. ⁴⁶ Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu. ⁴⁷ Lësca' caní, channö tu guiöj lo' gun ga gunu' dul-la', guléaj le. Gácarö dxi'a quiu' tsöjtsáziu' ga rinná bë'ë Dios zoa tuz guiöj lo', calëga zoa chopá guiöj lo', ate' tsöjtsáziu' lu guí' gabila.

⁴⁸ Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu.

⁴⁹ 'Ruxi'iru' bëla' zödi', en rugála'ru' le ra' guí', para cabí gaca ditaj. Lë ni rusedi rë'u ca ulu'huóáca dxi'a yúgu'të bönachi. Lësca' caní, rë'ënë' Dios izxí'i zödi' yúgu'të böa' bëdxido' tu'zégui'gaquië'-ba' lu bucugu lá'ayi queë'. ⁵⁰ Dxi'a naca zödi', pero channö initi yöl-la' siná'a que,

¿nacxi úniru' le siná'a? Guli'gaca la' libí'sili' ca zödi' dxi'a, sóali' dxí'ado' tuli' len ia'tuli'.

10

Rusëdinë' Jesús que nu rulá' yöl-la' nutsaga na'
(Mt. 19:1-12; Lc. 16:18)

¹ Buzë'ë Jesús yödzö Capernaum, ate' guyijë' luyú Judea, en gudödë' ia'tsölá'a yegu Jordán saca' ga rilén gubidza. Bulu'dubi leyúbölö bönachi zían ga zoë', ate' leyúbölö busëdinë' légaquië' ca run cazë'. ² Ní'irö bila'dxinë' bönni' yudo' fariseo ga zoë' Jesús, ate' tē'ënnë' ilunë' ga bi innë' Jesús para gaca ulu'zéguië' Lë' didza'. Gula'nábinë' Lë', ta'nnë':

—¿Dë lataj bönni' nutsaga nē'ë usanë'-nu nigula queë'?

³ Bubi'ë didza' Jesús, rnnë':

—¿Bizxi gunná bé'enë' Moisés libí'ili'?

⁴ Gula'nnë':

—Moisés bë'ë lataj nu bönni' uzúajë' lu guichi le rnna rulá'alenë'-nu nigula queë' na', ate' ní'irö usanë'-nu.

⁵ Bubi'ë didza' Jesús, rnnë':

—Gunná bé'enë' Moisés libí'ili' caní tu' naca zidi icja lādxi'do'oli', ⁶ pero cate' gusí lo rata' yödzölió, Dios benë' légaquië' bönni', en nigula. ⁷ Gunnë': "Que lë ni na' ucá'anë' bönni' xuz xinë'ë, en tsöjsóalenë'-nu nigula queë', ⁸ ate' chopë' ni ulu'huóáquië' ca tuz bönachi." Que lë ni na' bití'rö nácagaquië' chopë' pero tuz chinácagaquië'. ⁹ Que lë ni na' ca', nu naca bönachi bití' ral-la' ulá'a nupa na' chinutságuië' Dios.

¹⁰ Cate' gula'yázië' yu'u, gula'nabi yúdxinë' bönni' usëda queë' Jesús ca naca didza' na' bë'ë. ¹¹ Jesús gudxë' légaquië':

—Núti'tës bönni' ulá'alenë'-nu nigula queë', en utsaga ná'alenë'-nu nigula yúbölö, runë' dul-la' le riguitsaj xibá que yöl-la' nutsaga na' tu' rusubáguë'ë-nu dul-la' nigula na' guzóalenë'-nu zí'alö. ¹² Lësca' caní channö tu nigula nutsaga ná'lennu bönni' usannu-në', en sí'inu-në' bönni' yúbölö, runnu ca' dul-la' le riguitsaj xibá que yöl-la' nutsaga na'.

Jesús rulidza tsáhuë'ë-bi' yugu' bí'ido'
(Mt. 19:13-15; Lc. 18:15-17)

¹³ Ní'irö bila'dxín bönachi ga zoë' Jesús du-juá'gaquië' bí'ido' quéguequi. Të'ëni ixóa në'ë légacabi', ate' gula'sí lógaquië' bönni' usëda queë' Jesús ta'dil-la dídza'gaquië' nupa na' dujuá'agaca légacabi'. ¹⁴ Cate' bilé'enë' Jesús lë ni, gulënë' légaquië', en gunnë':

—Guli'güí'-gácabi' bí'ido' lataj ila'dxinbi' quia'. Biti' uzága'gacali'-bi', tu' gata' quégaca nupa nácgaca ca bí'ido' ni, lataj ga rinná bë'ë Dios. ¹⁵ Le nácatë rea' libí'ili': Nu cabí si' lu në'e le rinná bë'ë Dios ca runbi' tu bí'ido', bití' ca' tsaza ga ní rinná bë'ë.

¹⁶ Ní'irö Jesús bunidë'-bi' yugu' bí'ido' na'. Guxóa në'ë légacabi', en bulidza tsáhuë'ë-bi'.

Bönni' cuidi' napë' yöl-la' tsahui'
(Mt. 19:16-30; Lc. 18:18-30)

¹⁷ Cate' bu'ë Jesús nöza, carelö bidë' tu bönni', en buzóa zxibë' lahuë' Jesús, en gunábinë' Lë', rnnë':

—Bönni' Usedi idú dxi'a, ¿nacxi guna' para idéli'da' yöl-la' na'bán idú?

¹⁸ Jesús gudxë' lë':

—¿Bizx que ru'u neda' didza', rnno': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. ¹⁹ Chinöz quézinu' yugu' le gunná bë'ë Dios, gunnë':

Biti' gunu' dul-la' le riguitsaj xibá que yöl-la' nut-saga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácatë.

Biti' ucáchi'lanu'.

Ben bal xuz xinó'o.

²⁰ Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni nácatea' bí'ido'.

²¹ Len yöl-la' dxi'i ladxi' queë', Jesús buyúë' lë', rnnë':

—Tu le riyadzaj quiu'. Guyéaj, yöjëti' yúgu'të le dë quiu', en bunödzaj quégaca bönachi yechi' lë na' si'ü, ate' gata' quiu' yöl-la' tsahui' yehua' yubá. Ní'irö huödu' quia', gacu' ca tu bönni' sa'yéajë' sötj'të lë'e yaga cruz, ate' to'o neda'.

²² Cate' biyönnë' didza' ni, buí'innë', ate' söhuöjë' risëbi ládxë'ë tu' dëda' yöl-la' tsahui' queë'.

²³ Ní'irö buyúë' Jesús gásibi'ilë', en gudxë' yugu' bönni' usëda queë':

—Böniga naca ila'yaza nupa ta'lé'e yöl-la' tsahui' ga rinná bë'ë Dios.

²⁴ Bulu'bánninë' bönni' usëda queë' ca naca xtídzë'ë, ate' leyúbölö Jesús gudxë' légaquië':

—Libi'ili', xxi'ina'do', böniga naca ila'yázië' bönni' tu'zxöni ládxi'gaquië' yöl-la' tsahui' quégaquië' ga rinná bē'ē Dios. ²⁵ Nacarö böniga tsázië' nu bönni' rilé'enë' yöl-la' tsahui' ga rinná bē'ē Dios, ca tödiba' böa' ta'bía-ba' bönachi lu nagui yötsi'.

²⁶ Cate' bila'yönnë' didza' ni, bulu'bánitëronë' ca'. Ta'nnë' la' légacasë':

—¿Nuzxi caz gaca ulá, channö?

²⁷ Buyúë' Jesús légaquië', rnnë':

—Biti' gaca gun bönachi lë ni, pero huáquië' Dios, tu' rizéqui'në' Dios yúgu'të.

²⁸ Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Li'.

²⁹ Bubi'ë didza' Jesús, rnnë':

—Le nácatë rea' libí'ili', nu bönni' ucá'anë' lidxë', o böchë'ë, o zanë', o xuzë', o xinë'ë, o nigula queë', o yugu' xxi'inë', o xiyúë', tu' runë' xichina' o tu' runë' libán que didza' dxi'a quia', ³⁰ bönni' ni huazí' queë' ia'tú gayuá'tërö ca' dza ni zóaru' na'a, yugu' lidxë', en yugu' böchë'ë, en yugu' zanë', en yugu' xinë'ë, en yugu' xxi'inë', en yugu' xiyúë', enca' yugu' le ila'bía ládxi'gaca bönachi lë', ate' lu yödzölió si' za', gata' yöl-la' na'bán idú queë'. ³¹ Zían nupa nácagaca lo na'a, ilaca cuídi'sö ni', ate' nupa nácagaca cuídi'sö na'a, ilaca lo ni'.

Leyúbölö riguíxjö'ë Jesús ca si' ilútië' Lë'

(Mt. 20:17-19; Lc. 18:31-34)

³² Cate' ni' yú'ugaquië' nöza, ta'benë' sōjáquië' Jerusalén, nanöruë' Jesús lógaquië' bönni' usëda queë'. Nanítiguequinë', en lu yöl-la' rádxisö sōjácalenë' Lë'. Leyúbölö Jesús guchë'ë quez

idxínnutë' na'. Gusí lahuë' ru'ilenë' légaquië' didza' ca naca le ral-la' gaca queë'. ³³ Rnnë':

—Rilé'e quézili' ribenru' zéajru' Jerusalén ga ni' zoa nu udödi neda', Bönni' Guljé' Bönachi, lu ná'agaquië' bixúz unná bē', en lu ná'agaquië' bönni' yudo' usedi, ate' chúguië' quia' gátia', en ulu'dödë' neda' lu ná'agaquië' bönni' zi'tu'. ³⁴ Bönni' na' ulu'titjé' neda', en ilúndë'ë neda' zi'. Ulu'chejë' neda' zxöna'. Ní'irö ilútië' neda', pero cate' gaca tsonna dza ubana' lu yöl-la' guti.

Jacobo en Juan ta'nábinë' Jesús bi gunë' quégaquië' (Mt. 20:20-28)

³⁵ Ní'irö gula'biguë'ë Jacobo, en Juan, zxí'inë' Zebedeo, lahuë' Jesús, en tē' Lē':

—Bönni' Usedi, rē'ënitú' gunu' queëtu' le inábatu'.

³⁶ Jesús gudxë' légaquië':

—¿Bizxi rē'ënili' guna' queëli'?

³⁷ Gulë' Lē':

—Cate' idxín dza cō'u ga inná bē'u, ben ga cō'ötu' tutu' cuitu' ibëla, en ia'tutu' cuitu' yögöla.

³⁸ Ní'irö Jesús gudxë' légaquië':

—Biti' nözili' bi rinábali'. ¿Naru' huáca sí'ili' le ral-la' si'a neda', le naca le qui'i saca'a? ¿Naru' huáca idílali' nisa ca idila' neda' nisa, gátia'?

³⁹ Bulu'bi'ë didza', ta'nnë':

—Huácatu'.

Jesús gudxë' légaquië':

—Le nácatë, le qui'i saca'a neda', sí'ili' ca' libí'ili', en ca idila' neda' nisa, idílali' ca' nisa, ⁴⁰ pero biti' dē lu na'a cōa' nu cuía cuita' ibëla, en nu cuía cuita' yögöla. Dios unödzjé' quégaquië' bönni' chinupë'ë quégaquië' yugu' lataj na'.

⁴¹ Cate' bila'yönnë' ia'chíë' bönni' usëda queë' Jesús didza' ni, gula'lenë' Jacobo, en Juan na'.

⁴² Ní'irö Jesús bulidzë' légaquië', rnnë':

—Nöz quézili' ca tun nupa ta'nná be'e yugu' yödzö, tu'zenë' bach bönachi, ate' nupa nácagaca lo ládjagaquië' ta'nná be'e luzë'eguequi. ⁴³ Biti' gaca caní queëli', pero nu guë'ëni gaca zxön ga zóali', ral-la' gun xichinli' ia'zica'röli', ⁴⁴ ate' nütí'tëslöli' nu guë'ëni gaca lo ral-la' gaca ca bönni' huen dxin tsaz queëli' yúgu'tëli'. ⁴⁵ Caní ral-la' gunli' tu' bida' ni neda', Bönni' Guljë' Bönachi, calëga para nu gun xichina', pero para guna' xichíngaca bönachi, en udöda' yöl-la' na'bán quia' le huóá'uida' bönachi zían.

Jesús ruúnë' Bartimeo, bönni' lo chul-la
(Mt. 20:29-34; Lc. 18:35-43)

⁴⁶ Ní'irö bila'dxinë' Jesús, en yugu' bönni' dá'gaquië' Lë' yödzö Jericó. Cate' ni' rurujë' Jesús yödzö ni, dzágagaquië' Lë' yugu' bönni' usëda queë', enca' bönachi zían. Ra' nöza ni' rō'ë tu bönni' nachul-la lahuë', lë' Bartimeo, zxi'inë' Timeo. Rinabë' nu bi gúnnasö queë'. ⁴⁷ Cate' biyönnë' Bartimeo ridödë' Jesús, bönni' Nazaret, ni', gusi lahuë' ru'ë zidzaj didza', rnnë':

—¡Jesús, zxi'ini xi'sóë' David! ¡Buéchi' ladxi' neda'!

⁴⁸ Nupa ta'dödi ni' gula'dil-la lë' didza'. Të lë':

—Busayaj ru'u.

Ní'irö zídzejrö bulidzë', rnnë':

—¡Zxi'ini xi'sóë' David! ¡Buéchi' ladxi' neda'!

⁴⁹ Ní'irö guzóë' dxisö Jesús, ribözë', ate' rë' légaquië':

—Buli'lidzë'.

Bulu'lidzë' bönni' na' nachul-la lahuë'. Të' lë':

—¡Butipa ládzu'u! ¡Guyaschi! ¡Rulidzë' li'!

⁵⁰ Ní'irö gurú'unë' tsölá'alö lari' naxóa yenë'.
La' guyásatë', en bidë' ga na' zoë' Jesús. ⁵¹ Jesús
gunábinë' lë', rnnë':

—¿Bizxi rë'ënu' guna' quiu'?

Bubi'ë didza' bönni' na' nachul-la lahuë', rnnë':

—Bönni' Usedi, rë'ënda' gunu' ga huóálaj guiøj
lahua'.

⁵² Jesús gudxë' lë':

—Böaj lidxu'. Chinuhuóacu' tu' réajlë'u neda'.

La' böáljatë guiøj lahuë', ate' sa'yéajlenë' Jesús.

11

Riyazië' Jesús yödzo Jerusalén

(Mt. 21:1-11; Lc. 19:28-40; Jn. 12:12-19)

¹ Bila'dxinë' Jesús, en yugu' bönni' dá'gaquië' Lë'
gala' ga dë Jerusalén, ga na' nacuá' yödzo Betfagé,
en yödzo Betania, en ga na' dë ca' Guí'a Yaga Olivo.
Ní'irö Jesús gusöl-lë'ë chopë' bönni' usëda queë',

² en rë' légaquië':

—Guli'tséaj lu yödzo do' dë loru' ni', en cate'
tsú'uli' ni', tsöjxáca'li'-ba' tuba' búrrodo' nága'ba'
ni', en cuntu nu ribíani lëba'. Guli'sedxi-ba', en
guli'chë'-ba' quia' ni'. ³ Channö nu bi guíë libí'ili' tu'
runli' lë ni, guli'guíë nu na': "Xanru' riquinnë'-ba',
ate' la' usöl-la'të'-ba' quiu'."

⁴ Ní'irö yöjáquië', en yöjxáca'gaquië'-ba' búrrodo'
na', nága'ba' ra' nōza ga nu riyaza lö'a, ate'
gula'sedxë'-ba'. ⁵ Nupa nacuá' ni' tē légaquië':

—¿Bizxi ni runli'? ¿Bizx que risédxili'-ba' búrrodo'
na'?

⁶ Bulu'bi'ë didza' bönni' usëda queë' Jesús, gulë légaquië' ca na' chigudxi cazë' Jesús légaquië', ate' gulu'ë légaquië' lataj. ⁷ Ní'irö gula'ché'ë-ba' búrrodo' na' ga na' zoë' Jesús. Gula'xóë' lari' quégaquië' cúdzu'ba', ate' Jesús gudxië'-ba'. ⁸ Zián bönni' nacu'ë ni' gula'chiljë' lari' quégaquië' gapa naca la' nöza. Ia'bal-la bönachi ni' gula'guítsaj zin le bulu'zxóa la' nöza.

⁹ Gula'si lo nupa nanörugaca lahuë' Jesús, en nupa na' zá'gaca cúdzu'lë' tu'i zidzaj didza', ta'nnë':

—¡Yöl-la' ba! ¡Xanru' Dios gun lá'ayë' Bönni' zë'ë ni, nasöl-lë'ë Dios Lë'! ¹⁰ ¡Dios gun lá'ayë' Bönni' ni si' inná bë'ë, ca na' gunná bë'ë xuz xtó'oru' David! ¡Yöl-la' ba Dios!

¹¹ Caní guca, bidxinë' Jesús Jerusalén, ate' guyázië' lö'a yudo'. Cate' budxi buyúë' yúgu'të le nacuá' idú gásibi'ilö ni', burúajë' zaca' yödzö Betania tu' chiridzö', ate' dzágagaquië' Lë' yugu' bönni' usëda queë'.

Jesús rulidza zi'ë tu yaga higo
(Mt. 21:18-19)

¹² Cate' za' rení ia'tú dza, ate' tu'ruájë' Jesús, en yugu' bönni' dá'gaquië' Lë' yödzö Betania, ridunë' Jesús. ¹³ Zi'tu' bilé'enë' tu yaga higo dxía xilagui'. Gubígui'ë ga na' zoa yaga na' channö utsöjxaquië' lati' le ribía. Cate' bidxinë' ni' biti' bi yöjxáquië' le ribía. Xilágui'sö dxía tu' cabí ridxini dza cuía. ¹⁴ Ní'irö Jesús bulidzë' yaga na', rnnë':

—Bíti'rö nu gagu le ribía quiu'.

Yugu' bönni' usëda queë' bila'yönnë' didza' ni.

*Jesús rulatjē' lö'a yudo'**(Mt. 21:12-17; Lc. 19:45-48; Jn. 2:13-22)*

¹⁵ Cate' bila'dxinē' Jesús, en yugu' bönni' dá'gaquiē' Lē', yödzö Jerusalén, guyáziē' Jesús lö'a yudo', en gusí lahuē' rubéajē' ní'ilö nupa tuti', en nupa to'o lu lö'a yudo'. Burixē' yugu' blaga quégaca nupa tu'tsá' dumí izá'a, enca' yugu' ga ta'bō' nupa tuti' yugu' gu'dödo'. ¹⁶ Biti' ca' bē'ē lataj nu bi guá', uzóa nöza ga naca lö'a yudo'. ¹⁷ Busēdinē' nupa nacuá' ni', rnnē':

—Nazúaj lu guichi lá'ayi, rnna: “Lidxa' si'i le, yu'u ga bönachi idútē yödzölió ulu'lidza Dios.” Libí'ili' chinunli' le ca naca lídxigaca gubán.

¹⁸ Cate' yugu' bixúz unná bē', en yugu' bönni' yudo' usedi bila'yönnē' didza' ni, gula'sí lógaquiē' tu'guiljē' nacxi ilútiē' Jesús, pero tu' tádxinē' le ilún bönachi, biti' bi gulunē' queē', tu' tu'bani yúgu'tē bönachi ca naca le rusēdinē' Jesús. ¹⁹ Cate' chiridzō' burúajē' Jesús lu yödzö na'.

*Ribidxi yaga higo bulidza zi'ē Jesús**(Mt. 21:20-22)*

²⁰ Cate' za' rení ia'tú dza, gula'dödē' Jesús, en yugu' bönni' dá'gaquiē' Lē' ga zoa yaga higo na' bulidza zi'ē Jesús, en bila'lé'enē' le, chinabidxi idú luí. ²¹ Ní'irö yöjnenē' Pedro bi guca, ate' gudxē' Jesús:

—Bönni' Usedi, buyútsöca'. Chinabidxi yaga higo ni bulidza zi'u néaje.

²² Bubi'ē didza' Jesús, rē' légaquiē':

—Guli'tseajlē' Dios. ²³ Le nácatē rea' libí'ili', channö nu bönni' guíē' guí'ado' ni: “Gucuíta ni, yöjsóa lu nísado”, en biti' gaca chopa ládxē'ē bönni'

na', pero idú ládxë'ë tseajlë'ë gunë' Dios ca na' rnnë', ca' gaca. ²⁴ Que lë nì na' rea' libí'ili': Yúgu'të le inábali' cate' ulídzali'-në' Dios, guli'tséajlë' chibennë' Dios queëli' lë na' rinábali', ate' gunnë' queëli'. ²⁵ Cate' nì' rulídzali'-në' Dios, channö zoa nu rileli' nu bi ben queëli', buli'niti lo nu na', para uniti lahuë' ca' libí'ili' Xúzili' na' zoë' yehua' yubá ca naca dul-la' nabága'li'. ²⁶ Channö cabí uniti loli' bönachi, bití' uniti lahuë' Xúzili' zoë' yehua' yubá libí'ili' dul-la' nabága'li'.

Yöl-la' unná bë' dë lu në'ë Jesús

(Mt. 21:23-27; Lc. 20:1-8)

²⁷ Ní'irö Jesús, en yugu' bönni' dá'gaquië' Lë yøjhuöjgaquië' Jerusalén. Cate' nì' ridë' Jesús ga naca chila yudo', bila'dxinë' yugu' bixúz unná bë', en yugu' bönni' yudo' usedi, en bönni' gula tu'zéajni'inë', ga zoë'. ²⁸ Gula'nábinë' Jesús, ta'nnë':

—¿Bizxi yöl-la' unná bë' dë lu no'o runu' yugu' lë nì? ¿Nuzxi caz budödi lu no'o yöl-la' unná bë' gunu' caní?

²⁹ Bubi'ë didza' Jesús, rë' légaquië':

—Neda' ca' inábida' libí'ili' tu didza'. Channö ubí'ili' quia' didza', ní'irö guía' libí'ili' bi yöl-la' unná bë' rúnida' yugu' lë nì. ³⁰ ¿Nuzxi budödi lu në'ë Juan uquilë' bönachi nisa? ¿Naru' Dios o bönachi? Guli'nnátsöca'.

³¹ Gula'sí lógaquië' tun xtídza'gaquië' la' légacasë', ta'nnë':

—Channö innaru' Dios gusöl-lë'ë lë', guíë' rë'u: “¿Bizx que bití' guyéajlë'ëli' lë'?” ³² ¿Naru' guíëtsaru'-në': Gula'söl-lë'ë bönni' lë'?

Caní ta'zá' ládxi'gaquië' tu' tádxinë' le ilún bönachi zián nacuá' nì' tu' téquiguequi yúgu'të

bönachi na' bē'ē didza' Juan na' uláz queē' Dios.

³³ Que lē ni na' gulē' Jesús:

—Biti' nōztu'.

Ní'irō Jesús gudxē' légaquiē':

—Neda' ca' bití' quíxjöi'ida' libí'ili' bi yöl-la' unná
bē' dē lu na'a rúnida' yugu' lē ni.

12

*Rucúdzu'ē didza' Jesús ca gaca quégaca huen dxin
biti' nácgaca tsahui'*

(Mt. 21:33-46; Lc. 20:9-19)

¹ Ní'irō gusí lahuē' Jesús ruí'ilenē' yugu' bönni'
dá'gaquiē' Lē' didza' yugu' le rucúdzu'ē didza',
rnnē':

—Guzóē' tu bönni', budē'ē lubá uva zían ga naca
lu xiyúē'. Guléquiē' lē'a que, en guchō'önē' tu rōga'
guiōj ga isíē' xisi uva na'. Budxiē' tu yu'u gupa ga
naca xitsá' ga nu uyú xiyúē' na'.

'Ní'irō budödē' xiyúē' na' lu ná'agaquiē' huen
dxin, ila'zi'ē gatsaj huéaj le unödzej, ate' guy-
ijē' yödzö zi'tu'. ² Cate' bidxín dza ulu'chibē'
le ribía, gusöl-lē'ē-bi' bi'i huen dxin tsöjxí'ibi' lu
ná'agaquiē' huen dxin na' le ral-la' si'ē xanbi' que
le gula'bía lubá uva na'. ³ Ní'irō yugu' huen dxin
na' gula'guélē'ē-bi' bi'i na', en gulundē'-bi' zi', ate'
bulu'söl-lē'ē-bi' cá'asöbi'. ⁴ Ní'irō bönni' xan luyú
na' gusöl-lē'ē-bi' ia'tubi' bi'i huen dxin queē', ate'
bi'i ni bulu'ladxē'-bi' guiōj. Bulu'lē'ē ícjabi'. Gulu'ē
dō' queēbi'. ⁵ Ní'irō bönni' xan luyú na' gusöl-
lē'ē-bi' ca' ia'tubi' bi'i huen dxin queē', ate' bi'i ni
gulútiē'-bi'. Gusöl-lē'ē-bi' ca' zíanröbi', ate' bál-labi'
gulúngacadē'-bi' zi', en ia'bál-labi' gulútigaquiē'-bi'.

⁶ 'Cúnturö nu nagá'ana queë' xan luyú na'. Nagá'anasibi' zxí'inë', ate' nadxí'ide'enë'-bi'. Ga yöjsetë, gusöl-lë'ë-bi' zxí'inë', rnnë': "Ilunë' bal zxí'ina'." ⁷ Ní'irö yugu' bönni' huen dxin na' gula'nnë' la' légacasë', ta'nnë': "Bi'i ni ral-la' guequi queëbi' luyú ni. Guli'dá, gútiru'-bi', ate' guequi queëru' luyú ni." ⁸ Que lë ni na' gula'zönë'-bi', en gulútië'-bi'. Gula'rú'unë'-bi' ní'ilö ga dá'gaca lubá uva na'.

⁹ Ní'irö Jesús gunábinë' bönni' nacu'ë ni', rnnë':

—¿Nacxi gunë' bönni' xan luyú na', channö? Huidë', en gútigaquië' bönni' huen dxin na', ate' udödë' luyú na' lu ná'gaquië' bönni' yúbölö.

¹⁰ '¿Naru' cabí nulábanili' lë na' nazúaj lu guichi lá'ayi? Caní rna:

Guiöj na' gula'rú'unë' bönni' tu'cu'ë zö'ö, na'a naca guiöj len, squin zö'ö.

¹¹ Xanru' Dios benë' ga naca caní ate' rubániru' ca naca lë ni rilé'eru'.

¹² Ní'irö ta'zóa ta'bö'ë ila'zönë' Jesús tu' téquibe'enë' bucúdu'ë didza' ca naca quégaquië', pero tádxinë' le ilún bönachi zían nacuá' ni', en que lë ni na' bulu'cá'anë' Lë', söhuöjgaquië'.

Ca naca le ta'guíxaj lázagaca bönachi

(Mt. 22:15-22; Lc. 20:20-26)

¹³ Gudödi lë ni yugu' bönni' yudo' unná bë' na' gula'söl-lë'ë bal-lë' bönni' yudo' fariseo len bönni' dá'gaquië' Herodes ga zoë' Jesús para ilunë' ga bi innë' para gaca ulu'zéguië' Lë' didza'. ¹⁴ Bila'dxinë' bönni' ni ga na' zoë' Jesús, en tē' Lë':

—Bönni' Usedi, nözitu' ru'u didza' idútë li. Biti' ru'i ládxi'u bi ta'nnasö bönachi, tu' cabí ruyusu' le tu'lu'isö cuínguequi bönachi, pero rusëdinu' ca

nácatē le rē'enē' Dios ilún bönachi. ¿Ruí'i netu' lataj xibá queē' Moisés quíxaj laztu' le tu'quíxjē' uláz queē' César? ¿Naru' uguíxajtu' o bití' quíxajtu'?

¹⁵ Réquibe'enē' Jesús tu'ē didza' lu yöl-la' riguílaj ladxi' quégaquiē', ate' rē' légaquiē':

—¿Bizx que rubéajli' neda' didza'? Guli'diguá'tsöca' tu dumí ridá para ilé'eda' le.

¹⁶ Diguá'agaquiē' le, ate' Jesús gunábinē' légaquiē', rnnē':

—¿Nuzxi lahui da' lē'e ni, en nuzxi lē ni?

Bulu'bi'ē didza', ta'nnē':

—Queē' César na'.

¹⁷ Ní'irö Jesús gudxē' légaquiē', rnnē':

—Buli'nödzaj queē' César le nequi queē' César, ate' queē' Dios le nequi queē' Dios.

Bulu'bábinē' ca naca didza' bubi'ē Jesús.

Ca naca que yöl-la' rubán lu yöl-la' guti
(Mt. 22:23-33; Lc. 20:27-40)

¹⁸ Ní'irö bila'dxinē' bal-lē' bönni' yudo' saduceo ga zoē' Jesús. Bönni' ni ta'nnē' bití' ulu'bán nupa chinátigaca. Que lē ni na' gulē' Jesús, ta'nnē':

¹⁹ —Bönni' Usedi, Moisés nuzúajē' queēru' lu guichi channö gátiē' tu bönni' bití' zoa bí'i queē', ate' ugá'ananu nigula queē', bí'i böché'ē bönni' na' ral-la' utsaga ná'alénbi'-nu, en uzóabi' bí'ido' gácabi' bí'i queēbi' böchi'bi'. ²⁰ Gula'cuá'abi' gádxibi' bí'i nácacacabi' böchi'gacabi'. Bí'i huáca na' butsaga ná'alénbi'-nu nigula, ate' gútibi', cuntu nu zoa bí'ido' queēbi'. ²¹ Bí'i buropi na' butsaga ná'alénbi'-nu nigula uzēbi na', ate' gútibi' ca', cuntu nu zoa bí'ido' queēbi'. Lēasca' caní guca queēbi'

bi'i bunni. ²² Caní guca, bulu'tsaga ná'aleni'-nu yúgu'tëbi', cuntu nu zoa bí'ido' quégacabi'. Ga yöjsetë, gútinu ca' nigula na'. ²³ Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'aleni'-nu igádxitëbi'?

²⁴ Bubi'ë didza' Jesús, rë' légaquië':

—Richíxili' tu' cabí núnbë'ëli' le nazúaj lu guichi lá'ayi, en biti' nözili' ca naca yöl-la' huáca queë' Dios. ²⁵ Cate' ulu'bán nupa chinátigaca, biti' ca' ulu'tsaga ná'agaquië', ate' yugu' bönni' biti' ila'cuá'lenë' nigula, pero ilácagaquië' ca nácagaquië' gubáz lá'ayi queë' Dios, nacu'ë yehua' yubá. ²⁶ Na'a, ca naca quégaca nupa chinátigaca channö ulu'bán, ¿naru' cabí nulábanili' le buzúajë' lu guichi Moisés? Ruí'i didza' ca na' bulidzë' Dios lë' lu yaga yötsi'do' régui. Gudxë' lë': "Neda' naca' Dios queë' Abraham, en Dios queë' Isaac, en Dios queë' Jacob." Tu' gunné' caní quégaquië', naca bë' nabángaqueië' sal-la' gulátië' zí'alö. ²⁷ Dios náquië' Dios quégaca nupa nabángaca, calëga quégaca nupa nátigaca tsaz. Richíxitë'röli'.

Le naca lo le gunná bë'ë Dios

(Mt. 22:34-40)

²⁸ Bidë' ca' tu bönni' yudo' usedi ga zoë' Jesús. Biyönnë' ca na' gulu'ílenë' Jesús didza', en nözinë' dxí'ado' bubí'ë Jesús didza'. Que lë' ni na' gunábinë' Jesús, rnnë':

—¿Bízxilö le gunná bë'ë Dios nácätërö lo ca yúgu'të le gunná bë'ë?

²⁹ Bubi'ë didza' Jesús, rë' lë':

—Le gunná bë'ë le nácätërö lo ca yúgu'të naca lë' na' rnna: "Guli'yöni bönachí Israel. Xanru' Dios,

tuzë' Lë' náquië' Xanru'. ³⁰ Ral-la' idxí'inu' Xanu' Dios idú ládxu'u, en lu idú icja ládxí'do'o, en lu idú yöl-la' réajni'i quiu', en lu idú yöl-la' huáca quiu'." Lë ni naca le gunná bē'ë le nácatërö lo. ³¹ Le gunná bē'ë le naca buropi, lëbisö ca naca. Caní rnna: "Ral-la' idxí'inu' luzó'o ca nadxí'i cuinu'." Biti' ca' zoa ia'tú le gunná bē'ë le nácarö lo ca chopá ni gunná bē'ë.

³² Ní'irö bönni' yudo' usedi na' gudxë' Jesús, rnnë':

—Dxí'ado' gunnó', Bönni' Usedi. Le nácatë rnno'. Tuzë' náquië' Dios, en cúnturö nu zoa naca Dios. ³³ Para idxí'iru'-në' Dios idú ládxí'ru', en lu idú yöl-la' réajni'i queëru', en lu idú icja ládxí'do'oru', en lu idú yöl-la' huáca queëru', en para idxí'iru' luzá'aru' ca nadxí'i cuinru', nácarö lesaca' ca yúgu'të böa' bëdxido' rútigacaru'-ba' lu bucugu lá'ayi queë' Dios, enca' ca yúgu'të böa' bëdxido' ruzégui'gacaru'-ba' lu bucugu na'.

³⁴ Cate' biyönnë' Jesús dxí'ado' rubi'ë didza' bönni' ni, ní'irö gudxë' lë', rnnë':

—Ia'láti'sö riyadzaj quiu' gúnbë'u le rinná bē'ë Dios.

Cúnturö nu burugui bi inábini Jesús.

¿Nuzxi zxí'ini náquië' Cristo?

(Mt. 22:41-46; Lc. 20:41-44)

³⁵ Cate' ni' rusëdinë' Jesús bönachi ga naca chila yudo', rnnë':

—¿Bizx que ta'nnë' bönni' yudo' usedi náquië' Cristo zxí'ini xi'sóë' David? ³⁶ Lë cazë' David na' bē'ë didza', zóalenë' Dios Bö' Lá'ayi lë', gunné':

Xanru' Dios gudxë' Xana':

"Gurö'ö cuita lë'a ibëla

cate' gunra' ga ulu'zóa zxíbigaca lo'
nupa bití' ta'lé'e Li' dxi'a."

³⁷ ¿Naru' nácatsë' Cristo zxí'ini xi'sóë' David channö lë cazë' David na' rnnë' queë' náquië' Xanë'?

Bönachi zían nacuá' ni' tu'zë nágagaca Lë' gula'yaza ládxi'gaca didza' ni.

Jesús ruzéqui'ë didza' bönni' yudo' tu'sëdinë'
(Mt. 23:1-36; Lc. 11:37-54; 20:45-47)

³⁸ Ni' rusëdinë' Jesús yugu' bönni' dá'gaquië' Lë',
rë' légaquië':

—Gul'gún chi'i cuinli' quégaquië' bönni' yudo' tu'sëdinë'. Ta'yaza ládxi'gaquië' ta'dë' nilö na'lö, nácugaquië' lari' tunna. Ta'yaza ládxi'gaquië' ca' tu'lidza tsahui' bönachi légaquië' gapa naca lu yë'ëyi. ³⁹ Ta'bö'ë yugu' lataj lo lu yu'u ga tu'dubë' tu'sëdë' queë' Dios, enca' gapa tu'dubë' tē'aj tahuë'. ⁴⁰ Rugúagaquië' lídxi'gacanü nigula uzëbi, en para ulu'lu'isö tsahui' cuíngaquië', xidzé tu'lidzé' Dios. Bönni' ni, gúnda'rë' Dios légaquië' xíguia'.

Le bunödzjanu tu nigula uzëbido' queë' Dios
(Lc. 21:1-4)

⁴¹ Tsanni ni' rö'ë Jesús chila yudo' ga zoa gu'ína ga ta'gú'u bönachi dumí que yudó', ruyúë' ca tun bönachi ta'gú'u dumí lu gu'ína. Dumí zían ta'gu'ë bönni' dë yöl-la' tsahui' quégaquië'. ⁴² Ní'rö bidxinnu tu nigula yechi' uzëbido' ni', ate' gulú'unu chopa dumí lásido', le nazáca'gaca láti'do'os. ⁴³ Ní'rö bulidzé' Jesús yugu' bönni' usëda queë', en rë' légaquië':

—Le nácatë rea' libí'ili', nigula yechi' uzëbido' ni gulú'urönu ca yúgu'të nupa bi ta'gú'u lu gu'ína

que yudo'. ⁴⁴ Yúgu'të bönni' ni ta'gu'ë que le nagá'anasö quégaquië', pero nigula ni, lu yöl-la' yéchi'do' queënu gulú'unu idútë la's dui tsca le dësö queënu, le ral-la' gáhuinu.

13

Riguíxjö'ë Jesús ca si' ulu'quínnajë' yudo'

(Mt. 24:1-2; Lc. 21:5-6)

¹ Cate' burúajë' Jesús chila yudo', tuë' bönni' usëda queë' gudxë' Lë', rnnë':

—Bönni' Usedi, buyútsöca' náctiga yugu' yu'u zxön ni, en náctiga yugu' guiöj lë'e zö'ö quéguequi.

² Bubi'ë didza' Jesús, rë' lë':

—Rilé'enu' yugu' yu'u zxön ni, pero biti' ca' ugá'ana guiöj lahui luzé'e ni, tu' ulu'quínnaj bönnachi léguequi.

Le ilaca bë' cate' si' údxi que yödzöliö

(Mt. 24:3-28; Lc. 21:7-24; 17:22-24)

³ Ní'irö yöjáquië' Jesús, en yugu' bönni' dá'gaquië' Lë' lu Guí'a Yaga Olivo, guí'a na' dë ca dödilö ra' yudo'. Cate' chirö'ë Jesús ni', la' légacasë' Pedro, en Jacobo, en Juan, en Andrés, gulë' Lë', ta'nnë':

⁴ —Gudíxjö'i' netu' bátaxi ilaca lë ni. ¿Bizxi gaca bë' chizóa ilaca yúgu'të lë ni?

⁵ Bubi'ë didza' Jesús, rusëdinë' légaquië', rnnë':

—Guli'gún chi'i cuinli' para cabí nu si' ye'e libí'ili'. ⁶ Ila'lá' lahuë' zían bönni' si' lágaquië' ca lea' neda', ila'nnë' nácagaquië' Cristo. Caní ila'zí' yé'enë' bönnachi zían.

⁷ Ní'irö cate' yönili' raca gudil-la nilö ná'alö, biti' gádxili'. Yúgu'të lë ni ral-la' ilaca, pero biti' ridxini dza údxi. ⁸ Tu yödzö tíl-lalen ia'tú yödzö, en tu

ga nu rinná bē' tsöjtíl-lalen ia'tú ga nu rinná bē'. Zián lataj tödi budó' zxu', en tsu'u gubín. Ila'tsatsa bönachi. Yugu' lē ni ilaca le isí lo ila'guí'i ila'zaca' bönachi dza ni'.

⁹ Ní'irō guli'gún chi'i cuinli', tu' ulu'dödē' libí'ili' lu ná'agaquiē' bönni' yúlalui'. Ila'guiné' libí'ili' gapa tu'dubē' tu'sedē' queē' Dios bönni' judío. Idxinli' lógaquiē' bönni' ta'nná bé'enē' libí'ili', en lógaquiē' bönni' ta'nná bé'enē' yödzo zi'tu'. Ilunē' caní queēli' tu' dá'ali' neda', pero gunli' ba nali' quia' neda' ni'. ¹⁰ Zí'alō ca idxín dza údxi, run bayudxi gaca libán que didza' dxi'a quia' lógaca bönachi idútē yödzölió. ¹¹ Cate' ni' ila'ché'ē libí'ili', en ulu'dödē' libí'ili' lu ná'agaquiē' bönni' yúlalui', bití' güí'i ládxi'li' bizxi innali'. La' dza ní'isō Dios gunnē' queēli' didza' güí'ili', ate' lē ni innali'. Cate' ni' güí'ili' didza', calēga libí'isili' na' innali', pero Dios Bö' Lá'ayi innē'. ¹² Ulu'dödi bönachi la' böchi'gacasō lu ná'agaquiē' bönni' ilútiē' légaquiē'. Yugu' bönni' nacuá'abi' bi'i quégaquiē' ulu'dödē' la' xzí'inigaca cazē' ca', ate' xzí'inigaquiē' na' ulu'dödibi' la' xuz xiná'agaca cázabi' lu ná'agaquiē' bönni' ilútiē' légaquiē'. ¹³ Yúgu'tē bönachi ulu'zóa libí'ili' tsölá'alō tu' dá'ali' neda', pero núlöli' guá' ilenli' lē na' ga idxinrō dza údxi, uláli'.

¹⁴ 'Nupa tu'laba didza' ni ral-la' ila'yéajni'i. Buzúajē' lu guichi Daniel, bönni' ni' bē'ē didza' uláz queē' Dios, le rnna caní: "Tsaz tu le xi-hui' le rucá'ana cané ga naca la'ayi." Dza ní'irō ral-la' ila'zxunnaj nupa nacuá' luyú Judea, en tsöjaca gapa naca lu guí'ado'. ¹⁵ Nu zoa ícjo'olō dza ni' ral-la' izxúnnajtē, en bití' huötaj zxan yu'u para tsöjzxí' bi dē que lu yu'u. ¹⁶ Nu zoa la'

guixi' ral-la' izxúnnajtë, en biti' huőaj tsőjzxí' lari' rixóa yeni. ¹⁷ Bica' bayechi' yugu' nigula dza ni' nuá'agacanu-bi' bí'ido', enca' nigula tu'gádxí'nu-bi' bí'ido'. ¹⁸ Buli'lidzë' Dios inábili'-në' cabí gun bayudxi izxúnnajli' cate' raca beo' ziaga ca'. ¹⁹ Yugu' dza ni' ila'guí'i ila'zaca'rö bönachi ca le guca zí'atëlö cate' si' guta' yödzölió le benë' Dios ga ridxintë na'a dza, ate' dza zá'gaca biti' gaca caní. ²⁰ La'tu' cabí nunë' Dios ga ulu'huóaca nabábasö yugu' dza ni', cuntu nu ulá, pero tu' nadxí'inë' nupa chigurö cazë', chinunë' queë' gunë' ga ulu'huóaca nabábasö yugu' dza ni'.

²¹ 'Na'a, channö nu guíë libí'ili': "Buli'yútsöca', ni zoë' Cristo", o inná: "Buli'yútsöca', ni' zoë'", biti' ca' tséajlë'eli' nu na'. ²² Ila'lá' lahuë' zían bönni' ila'zí' yé'enë' bönachi. Ila'nnë' nácagaquië' Cristo, en ila'nnë' nácagaquië' bönni' tu'ë didza' uláz queë' Dios. Ulu'luí'inë' le ilaca bë', en ilunë' yugu' yöl-la' huáca zxön. Huala'zí' yé'enë' ca' nupa gurö cazë' Dios channö ila'zéqui'në'. ²³ Ní'irö libí'ili', guli'sóa ban ladxi'. Yúgu'të chigudxa' libí'ili' zí'atëlö ca gaca.

Ca huödë' Bönni' Guljë' Bönachi
(Mt. 24:29-35, 42-44; Lc. 21:25-36)

²⁴ Gunnë' ca' Jesús:

—Yugu' dza ni', tödi gaca dza na' ila'guí'i ila'zaca' caní bönachi, ichul-la gubidza, en biti' cu'u bení' beo'. ²⁵ Ila'guínnaj böla'j lúzxiba, en ila'zxizi le nál-lagaca nalá'gaca lúzxiba na'. ²⁶ Ní'irö ila'lé'eni neda', Bönni' Guljë' Bönachi, za'a lu böaj lúzxiba, napa' yöl-la' huáca zxön, en yöl-la' bení' quia'. ²⁷ Isöl-la'gaca'-në' gubáz lá'ayi quia', ate' ulu'tubë'

bönachi gurö caza' quia' nacuá' idapa la'a yödzölió, ga naguéla'të luyú bidxi, ga ridxintë ga naguela' lúzxiba.

²⁸ 'Guli'tséajni'i le rusedi yaga higo ni'. Cate' ta'lén ni'a në'e hué'énido', en rubía xilagui' yulu, nözili' chizóa idxín beo' cusubá. ²⁹ Lësca' caní, cate' ilé'eli' taca lë ni, inözili' chizóa idxín dza údxi na', en chiridzaga lo. ³⁰ Le nácatë rea' libí'ili', yúgu'të lë ni ilaca zí'atëlö ca ilátigaca nupa nacuá' dza na'. ³¹ Huadödi que lúzxiba, en que luyú ni, pero xtídza'a catu caz tödi que.

³² 'Cate' idxín dza ni' o rëla ni', cuntunu nözi. Biti' nözguequinë' gubáz lá'ayi nacu'ë yehua' yubá, en bití' nözda' neda', Zxí'inë' Dios. Tuzë' Dios Xuz nözinë'. ³³ Que lë ni na', buli'subán ládxi'li'. Guli'sóa sina', en buli'lidzë' Dios tu' cabí nözili' bizxi dza gaca lë ni. ³⁴ Gaca ca raca cate' sa'yéajë' zí'tu' tu bönni'. Cate' chizóa uzë'ë lidxë', udödë' lu ná'agaquië' huen dxin queë' yugu' le dë queë'. Que queëgaquië' gu'ë xichíngaquië', en inná bë'ë soa ban ladxi' nu zoa huen chi'i ga nu riyaza. ³⁵ Guli'sóa libí'ili' ban ladxi' tu' cabí nözili' bátaxi huödë' xan yu'u, cate' chiridzö', o gatsaj lahui' yëla, o cate' ribödxiba' böra, o zílado'. ³⁶ Guli'gún caní, para cabí idixáquië' libí'ili' rásili' channö huödë' tsárido's. ³⁷ Lë ni rea' libí'ili', rea' ca' yúgu'të bönachi: Guli'sóa ban ladxi'.

14

*Tun xtídza'gaquië' bönni' yudo' ila'zönë' Jesús
(Mt. 26:1-5; Lc. 22:1-2; Jn. 11:45-53)*

¹ Ia'chopa dza ca' gaca Laní Pascua cate' tu'subanë' bönni' judío ca benë' Dios, bubéajë' xuz

xtó'ogaquië' luyú Egipto. Naca laní cate' tahuë' yöta xtila biti' nazí' cúa zi que. Ta'zóa ta'bö'ë yugu' bixúz unná bē', en bönni' yudo' tu'sēdinē' ila'zönē' Jesús bagáchi'sō para ilútiē' Lē'. ² Ta'nnē':

—Biti' gaca sōnru'-nē' dza laní tu' ila'tsatsa bōnachi.

*Nigula rigú'unu le rilá' zxixi icjē' Jesús
(Mt. 26:6-13; Jn. 12:1-8)*

³ Zoë' Jesús yōdzō Betania, lu yu'u lidxē' Simón, bönni' gü'ínē' huē' nudzu' ruzōdi. Tsanni ni' rō'ë rahuë' Jesús, guyázanu tu nigula, nuá'anu tu böga'do' néquini guiōj zaca', yudzu le rilá' zxixi que yōj susén lasi idú, le nazaca' yenni'. Gulá'anu böga'do' na', en gulú'unu le rilá' zxixi na' icjē' Jesús. ⁴ Gula'lélanē' bal-lē' bönni' nacu'ë ni'. Ta'nnē' la' légacasē':

—¿Bizx que guca ditaj le zxixi na'? ⁵ La'tu' nu guti' lē na', huazí' que ia'lati' ca lázxjaru' que tu iz para nu quisi le quégaca bōnachi yechi'.

Gula'nnēdē'ë queēnu.

⁶ Ní'irō Jesús bē'ë didza', rnnē':

—Guli'gü'i-nu lataj. ¿Bizx que rinnē zí'ili' queēnu? Naca dxi'a le bennu quia'. ⁷ Nacuá'lentica'sō bōnachi yechi' libí'ili', en bátati'tēs guē'ēnili', huáca gunli' dxi'a quégaquiē', pero neda' biti' sóatica'sa' ga zóali'. ⁸ Tsca le guzxéqui'nu bennu nigula ni. Cate' gulú'unu le rilá' zxixi ni neda', bupá'anu neda' zí'atēlō ca igácha'a yeru ba. ⁹ Le nácatē rea' libí'ili', gáti'tēs ga gaca libán que didza' dxi'a quia' idú yōdzōlió, soa nu quixjō' ca' lē ni bennu nigula ni quia'. Caní gaca para nu tsōjné lēnu.

Rizí' lu në'ë Judas udödë' Jesús

(Mt. 26:14-16; Lc. 22:3-6)

¹⁰ Ní'irö birúajë' Judas Iscariote, bönni' nabábalenë' chínnuë' na' dá'gaquië' Jesús. Guyijë' ga nacu'ë bixúz unná bë' para udödë' Jesús lu ná'agaquië'. ¹¹ Cate' bila'yönnë' xtídzë'ë Judas na', bulu'dzéjanë', ate' gula'zí' lu ná'agaquië' ilu'ë lë' dumí. Ní'irö gusí lahuë' Judas rizó'a ribö'ë udödë' Jesús lu ná'agaquië'.

Le rë'aj ráguru' rusubanru' ca gútië' Xanru'

(Mt. 26:17-29; Lc. 22:7-23; Jn. 13:21-30; 1Co. 11:23-26)

¹² Naca dza risí lo laní cate' tahuë' yöta xtila biti' nazí'i cúa zi que, dza na' tutië'-ba' bö'cu' zxíla'do' tahuë'-ba' dzö' Laní Pascua na', cate' tu'subanë' ca benë' Dios busölë' bönachi judío luyú Egipto. Ní'irö bönni' usëda queë' Jesús gula'nábinë' Lë', ta'nnë':

—¿Gazxi rë'ënu' tséajtu' tsöjpá'atu' le gáguru' xtsö' que Laní Pascua?

¹³ Ní'irö Jesús gusöl-lë'ë chopë' bönni' usëda queë', en rë' légaquië':

—Guli'tséaj lu yödzö. Ni' huadzágali' tu bönni' nu'ë tu rö'ö nisa. Guli'tséajlenë'. ¹⁴ Ga na' tsázië', guli'guié' xan yu'u na': “Rnnë' Bönni' Usedi: ¿Gazxi zoa yu'u ga na' gágulengaca'-në' bönni' usëda quia' xtsö' que Laní Pascua?” ¹⁵ Ní'irö uluí'inë' libí'ili' tu yu'u zxön ga naca buropi cuía ga chinabá'a. Buli'pá'a le gáguru' ni'.

¹⁶ Bila'rúajë' bönni' usëda queë' na', en bila'dxinë' lu yödzö, ate' yöjxáca'gaquië' yúgu'të ca na' chigudxë' légaquië' Jesús. Bulu'pë'ë le ilahuë' ni' que Laní Pascua.

17 Cate' chizá' ral-la, bidxinë' Jesús ni', dzágagaquië' idxínnutë' bönni' usëda queë' Lë'.
18 Tsanni ni' rö'ögaquië' tahuë', bë'ë didza' Jesús, rnnë':

—Le nácatë rea' libí'ili', zoa nu dzaga libí'ili', nu rágulen neda' tsözxön, nu udödi neda' lu ná'agaca bönnachi.

19 Ní'irö bulu'huí'innë', en gula'sílógaquië' tu tuë' të' Lë':

—¿Naru' neda'?

Ia'túë' ca' gunnë':

—¿Naru' neda'?

20 Bubi'ë didza' Jesús, rë' légaquië':

—Naca tu nu nutsa' ladaj chínnuli' ni, bönni' na' nunë'ë në'ë tsözxön len na'a lu yö'öna. 21 Tseja' ga gátia' neda', Bönni' Guljë' Bönnachi, ca na' nazúaj lu guichi lá'ayi ca gaca quia', pero bica' bayechi' bönni' na' udödë' neda' lu ná'agaquië' bönni' ilútië' neda'. Gácarö dxi'a queë' bönni' na' la'tu' cabí guljë'.

22 Tsanni ni' tahuë', gudélë'ë Jesús yöta xtila. Gudxë' Dios: "Xclenu'." Buzxuzxjë' le, en bë'ë quégaquië', rnnë':

—Guli'gagu. Lë ni naca bëla' rön quia'.

23 Gudélë'ë ca' tu zxíga'do', en gudxë' Dios: "Xclenu'." Ní'irö bë'ë quégaquië', ate' yúgu'të' gulë'ajë' le. 24 Jesús rë' légaquië':

—Lë ni xichöna' le run tsutsu didza' cubi rucá'ana tsahui', le núnlenë' Dios bönnachi. Rön ni ilalaj ni'a quégaca bönnachi zían. 25 Le nácatë rea' libí'ili', bíti'rö guí'ja' xisi uva ga idxinrö dza guí'ja' le cubi ga ni' rinná bë'ë Dios.

Jesús rnnë' innë' Pedro biti' núnbë' ë Lë'

(Mt. 26:30-35; Lc. 22:31-34; Jn. 13:36-38)

²⁶ Gudödi gulúl-lë' yöl-la' ba, bila'rúajë' sôjáquië' Guí'a Yaga Olivo. ²⁷ Ní'irö Jesús gudxë' légaquië', rnnë':

—Yúgu'tëli' gaca chopá ládxi'li', ucá'anali' neda' na'a dzö', tu' nazúaj lu guichi lá'ayi, rnna: “Gutia'-në' uyú bö'cu' zxila', ate' ilásilasiba' bö'cu' zxila' na'.” ²⁸ Tödi ubana' lu yöl-la' guti, tseja' luyú Galilea zí'alö ca libí'ili'.

²⁹ Ní'irö Pedro gudxë' Jesús, rnnë':

—Sal-la' yúgu'të' ilaca chopá ládxi'gaquië', en ulu'cá'anë' Li', biti' ca' gaca chopá ládxa'a neda'.

³⁰ Jesús gudxë' lë', rnnë':

—Le nácatë rea' li', la' dzö' nisö, si' cödxilöba' böra le buropi luzuí, tsonna luzuí innó' biti' núnbë'u neda'.

³¹ Ní'irö Pedro buzötjë' Dios, rnnë':

—Sal-la' gátilentea' Li' tsözxön, biti' ca' innía' biti' núnbë'a Li'.

Lësca' caní gula'nnë' yúgu'të'.

Jesús rulidzë' Dios la' yëla Getsemaní

(Mt. 26:36-46; Lc. 22:39-46)

³² Ní'irö Jesús, en bönni' dá'gaquië' Lë' bila'dxinë' la' yëla Getsemaní, ate' Jesús gudxë' légaquië', rnnë':

—Guli'cö' ni, tsanni tseja' neda', tsöjlidza'-në' Dios.

³³ Jesús guchë'ë Pedro, en Jacobo, en Juan, ate' gusí lahuë' ridzöbinë', en risëbi ládxe'ë. ³⁴ Gudxë' légaquië', rnnë':

—Huati caza' lu yöl-la' risëbi ládxi'. Guli'cöz ni, en guli'ná' yëla.

³⁵ Ní'irö guzë'ë Jesús ia'láti'do', en busudxín lahuë' lu yu, bulidzë' Dios. Gunábinë' Lë', channö huáca, ucuítë' queë' le ral-la' qui'i sáquë'ë dza na'.

³⁶ Ní' rulidzë' Dios, rnnë':

—Xúza'do', yúgu'të huáca gunu' Li'. Gucuíta lë na' ral-la' qui'i saca'a, pero calëga ca rë'ënda' neda', pero ca rë'ënu' Li', gunu'.

³⁷ Ní'irö böajë' Jesús ga na' nacu'ë bönni' usëda queë', atë' yöjxáquië' légaquië' tasië'. Gudxë' Pedro:

—Simón, ¿rásitso'? ¿Naru' cabí rubéajtso' yëla lo' tu chí'ido'? ³⁸ Guli'ná' yëla, en buli'lidzë' Dios, inábili'-në' para cabí gata' lataj tu' xihui' idilú'u yöl-la' libí'ili'. Le nácatë bö' naca cázali' zoa caz sina', pero lu yöl-la' bönáchisö queëli' ricuídi'li'.

³⁹ Ní'irö sa'yéajë' Jesús leyúbölö, rulidzë' Dios, en la' tuz ca gunné'. ⁴⁰ Cate' böajë' leyúbölö ga na' nacu'ë, yöjxáquië' légaquië' tasië' tu' nadödité yëla lógaquië'. Biti'nözguequinë' bizxi didza' ulu'bi'ë, le ilë' Lë'. ⁴¹ Cate' böajë' le bunni luzuí ga na' nacu'ë, rë' légaquië':

—¿Rásitsali'? ¿Ruzi'tsa ládxi'li'? ¡Tsa'ti' gaz! ¡Chibidxín dza! ¡Buli'yútsöca', Neda', Bönni' Guljë' Bönachi, chinadöda' lu ná'agaca bönachi dul-la'!

⁴² ¡Guli'chasa, uyéajru'! ¡Buli'yútsöca', chizë'ë bönni' na' udödë' neda' lu ná'agaca bönachi!

Ta'zönë' Jesús

(Mt. 26:47-56; Lc. 22:47-53; Jn. 18:2-11)

⁴³ Ní' ru'ë Jesús didza' ni, bidxinë' Judas, bönni' nabábalenë' chínnuë' na' dá'gaquië' Jesús, atë' zá'lengaquië' bönni' zían lë', nuá'agaquië' guíë' tuchi', en yaga. Yugu' bixúz unná bë', en yugu' bönni' yudo' usedi, en bönni' gula tu'zéajni'inë'

nasöl-la'gaquië' légaquië'. ⁴⁴ Judas, bönni' na' rudödë' Jesús lu ná'agaquië' chinulu'ínë' légaquië' tu le gunë' le gaca bë' nu naca Jesús, gunnë':

—Bönni' na' utsaga lahua'-në', Lë' na' Jesús. ¡Guli'sönë', en guli'chë'ë! ¡Guli'yútsöquië'!

⁴⁵ Cate' bidxinë' Judas ni', la' gubíga'të' ga na' zoë' Jesús, en gudxë' Lë':

—Bönni' Usedi, Bönni' Usedi.

Ní'irö busudxín lahuë' Jesús. ⁴⁶ Ní'irö gula'zönë' Jesús, en gula'chë'ë Lë' nadzunë'.

⁴⁷ Ní'irö tuë' bönni' ni' dë'ë Jesús guléajë' guíë tuchi', en benë'-bi' huë' bi'i huen dxin queë' bixúz lo. Guchúguíë' guídi nágabi'. ⁴⁸ Jesús gudxë' bönachi na', rnnë':

—¿Narúajtsali' nuá'ali' guíë tuchi', en yaga para sönli' neda', runli' ca runli' cate' rizönli'-në' gubán? ⁴⁹ Yugu' dza guzóalena' libí'ili' rusédigacada' bönachi ga naca chila yudo', ate' biti' guzxönli' neda', pero raca caní para gaca le nazúaj lu guichi lá'ayi.

⁵⁰ Ní'irö yúgu'të bönni' usëda queë' Jesús bulu'cá'anë' Le', ta'zxúnnajë'.

Rízxúnnajbi' tubi' bi'i ra'bán

⁵¹ Zóabi' ca' ni' tubi' bi'i ra'bán sőjnobi' Jesús, nuxóasö cuinbi' tu lari' blaga'. Yugu' bönni' na' nachë'gaquië' Jesús gula'zönë'-bi' ⁵² pero busanbi' lari' na', en xiguídisöbi' buzúnnajbi'.

Rídxinë' Jesús lógaquië' bönni' yúlahui' lo

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Gula'chë'ë Jesús lahuë' bixúz lo, ate' bulu'dubë' ni' yúgu'të bixúz unná bë', en bönni'

gula tu'zéajni'inë', en yugu' bönni' yudo' usedi.
⁵⁴ Pedro yöjnahuë' Jesús zi'tu' zí'tu'sö, en guyázië'
 lö'a lidxi bixúz lo na', en gurö'ölenë' tsözxön yugu'
 ni'a në'ë bixúz lo na', rutsë'e cuinë' ra' guí'.

⁵⁵ Yugu' bixúz unná bë' len yúgu'të bönni' yúlahui'
 lo bulu'guiljë' tu le ulu'subáguië' Jesús para gaca
 ila'chúguië' queë' gátie' pero biti' bi bulu'dzölinë'.

⁵⁶ Bönni' zían gula'nnë' queë' Jesús le cabí nácatë,
 pero biti' yöjlözagaca le gula'nnë' queë'. ⁵⁷ Ní'irö
 gula'zuinë' yugu' bönni' gula'nnë' queë' Jesús le
 cabí nácatë, ta'nnë':

⁵⁸ —Netu' biyöñitu' didza' bë'ë bönni' ni, gunnë':
 “Uquínaja' yudo' ni, lë ni nequi lu ni'a lu na'
 bönachi, ate' tsonna dzasö uchisa' ia'tú le cabí
 nequi lu ni'a lu na' bönachi.”

⁵⁹ Lësca' lë ni, biti' yöjlözagaca xtídza'gaquië'.

⁶⁰ Ní'irö guyasë' bixúz lo na' gatsaj láhui'lö
 bönachi nacuá' ni', en gunábinë' Jesús, rnnë':

—¿Naru' cabí rubi'itso' didza'? ¿Bizxi na' ta'nnë'
 quiu' bönni' ni?

⁶¹ Jesús, dxisö zoë'. Biti' bi didza' rubi'ë.
 Gunábinë' Lë' leyúbölö bixúz lo na', rnnë':

—¿Naru' nacu' Li' Cristo, Zxi'inë' Dios Lá'ayi?

⁶² Bubi'ë didza' Jesús, rnnë':

—Naca'. Ilé'eli' neda', Bönni' Guljë' Bönachi, soa'
 cö'a cuitë' ibëla Dios napa cazë' yöl-la' huáca cate'
 ni' huöda' lu böaj lúxiba.

⁶³ Ní'irö bixúz lo na', lu yöl-la' rilé queë' guchözë'
 lari' nácuë', rnnë':

—¿Núzxirö naquíniru' nu quixjö'? ⁶⁴ ¡Riyön
 quézili' rucá'anë' Dios cá'asö len didza' ru'ë! ¿Nacxi
 rusáca'li' queëli'?

Yúgu'të' gula'chúguië' queë' gátie'.

⁶⁵ Ní'irö gula'sí lógaquië' bal-lë' tu'chejë' Jesús zxöna'. Bulu'sayjë' lahuë', en gulundë' Lë' zi', ta'nnë':

—Gunnë yá'atsöca' nuzxi na' bë' Li'.

Yugu' bönni' ni'a në'ë bixúz lo gula'gápë'ë ru'ë Jesús.

Rnnë' Pedro biti' núnbë'ë Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Cate' ni' zoë' Pedro lö'a zxañ yu'u, bidxinbi' tubi' bi'i nigula huen dxin queë' bixúz lo na' ga na' zoë'. ⁶⁷ Cate' bilé'ebi' Pedro, rö'ë rutsë'e cuinë' ra' guí, buyubi' lë', rnnabi':

—Do'o ca' li' Jesús, bönni' Nazaret na'.

⁶⁸ Gudá'baguië' Pedro, rnnë':

—Biti' núnbë'a-në', en biti' nözda' bizxi na' rnno'.

Burúajë' Pedro yöjsöë' ga nu riyaza lö'a. Ní'irö gurödxiba' böra. ⁶⁹ Buyubi' lë' leyúbölö bi'i nigula huen dxin na', en gusí lobi' rëbi' nupa nacuá' ni':

—Bönni' ni dzáguië' légaquië'.

⁷⁰ Leyúbölö gudá'baguië' Pedro. Ia'lati' gudzé nupa nacuá' ni' tē Pedro, ta'nná:

—Le nácatë dzagu' légaquië', tu' nacu' bönni' Galilea. Yöl-la' ruí'isö quiu' didza' naca bë'u, tu' tuz ca ruí'ili' didza'.

⁷¹ Gusí lahuë' Pedro rudxía dö' cuinë', en ruzötjë' Dios, rnnë':

—Biti' ca' núnbë'a-në' bönni' na' ruí'ili' didza' ca naca queë'.

⁷² La' gurödxitëba' böra le buropi luzuí. Ní'irö yöjnenë' Pedro didza' na' bë'ë Jesús, gudxë' lë': “Zí'alö cödxiba' böra le buropi luzuí, tsonna luzuí innó' biti' núnbë'u neda'.” Cate' yöjnenë' didza' ni, gusí lahuë' ribödxidë'ë.

15

Ridxinë' Jesús lahuë' Pilato, bönni' rinná bë'ë

(Mt. 27:1-2, 11-14; Lc. 23:1-5; Jn. 18:28-38)

¹ Ni' naca zílado', yugu' bixúz unná bë' len bönni' gula tu'zéajni'inë', en yugu' bönni' yudo' usedi, en yúgu'të bönni' yúlahui' lo gulún xtídza'gaquië'. Ní'irö gula'chë'ë Jesús náguë'ë, en bulu'dödë' Lë' lu në'ë Pilato, bönni' rinná bë'ë uláz que yödz Roma.

² Pilato gunábinë' Jesús, rnnë':

—¿Naru' nacu' Li' Bönni' inná bé'enë' bönachi judío?

Bubi'ë didza' Jesús, rnnë':

—Ca nácatë rnnó'.

³ Yugu' bixúz unná bë' bulu'zéguië' Jesús didza' le zían. ⁴ Ní'irö Pilato gunábinë' Lë' leyúbölö, rnnë':

—¿Naru' cabí rubi'itso' didza'? Buzëtsöca' nagu' cate' xö zían le ta'nnë' quiu'.

⁵ Biti' bi didza' bubi'ë Jesús. Ca' guca, bubábinë' Pilato.

Ta'chúguië' queë' Jesús gátië'

(Mt. 27:15-31; Lc. 23:13-25; Jn. 18:38-19:16)

⁶ Dë tu le runë' Pilato cate' raca laní na', rusanë' lu ná'agaca bönachi tu bönni' nadzunë' lidxi guíë, núti'tës nu ta'naba. ⁷ Nadzunë' tu bönni' lë' Barrabás lidxi guíë, ate' dzágagaquië' lë' ia'bal-lë' luzë'ë, yugu' bönni' gulútië' bönachi cate' gula'dá'báguië' yúlahui'. ⁸ Cate' bila'dxín bönachi zían ni', gula'sí lógaquië' ta'nabë' lahuë' Pilato gunë' quégaquië' ca run cazë'. ⁹ Bubi'ë didza' Pilato, rnnë':

—¿Rë'ënili' usana'-në' queëli' Bönni' Inná Bé'enë' Bönachi Judío?

¹⁰ Caní gunné' Pilato tu' réquibe'enē' bulu'dödē' yugu' bixúz unná bē' Jesús lu nē'ē' tu' tu'zxé'enē' Lē'. ¹¹ Yugu' bixúz unná bē' na' gula'gu'ē xilá lādxi'gaca bönachi zían na', para ila'nabē' lahuē' Pilato usanē' lu ná'agaquiē' Barrabás. ¹² Ní'irō Pilato gunábinē' légaquiē' leyúbölö, rnnē':

—¿Bizxi rē'enili' guna' queē' bönni' na' ru'ili' lē', Bönni' Inná Bé'enē' Bönachi Judío?

¹³ Gulu'ē zidzaj didza', ta'nnē':

—¡Budē'ē lē'e yaga cruz!

¹⁴ Gunábinē' Pilato légaquiē', rnnē':

—¿Bizxi caz dö' nu'ē?

Leyúbölö tu'ē zidzaj didza', ta'nnē':

—¡Budē'ē lē'e yaga cruz!

¹⁵ Tu' gú'unnē' Pilato gunē' ga ila'yaza lādxi'gaca bönachi zían na', busanē' Barrabás lu ná'agaquiē'. Ní'irō gunná bé'enē' nu quin Jesús, ate' budödē' Lē' lu ná'agaquiē' bönni' ulu'dē'ē Lē' lē'e yaga cruz.

¹⁶ Ní'irō yugu' bönni' röjáquiē' gudil-la gula'chē'ē Jesús lö'a yúlahui', ate' bulu'tubē' luzá'agaquiē' ni'.

¹⁷ Bulu'gácuē' Jesús tu lari' xiná gul-la, en gulunē' tu bregui' ni'a nē'e yötsi', le bulu'dxiē' icjē'. ¹⁸ Ní'irō gula'sí lógaquiē' tu'lidzē' Jesús, ta'nnē':

—¡Yöl-la' ba li', rinná bé'enu' bönachi judío!

¹⁹ Gula'guínē' gui icjē', en bulu'chejē' Lē' zxöna'. Bulu'zóa zxíbigaquiē' lahuē', en lu yöl-la' rutitaj gulunē' Lē' bal. ²⁰ Cate' budxi bulu'titjē' Lē', bulu'gúē' lari' xiná chul-la na' nácuē' ate' bulu'gácuē' Lē' lari' que cazē'. Ní'irō gula'chē'ē Lē' ní'ilö yúlahui' na' para tsöjda'gaquiē' Lē' lē'e yaga cruz.

Tu'dē'ē Jesús lē'e yaga cruz

(Mt. 27:32-44; Lc. 23:26-43; Jn. 19:17-27)

²¹ Gulunë' ga bi'ë tu bönni' Cirene yaga cruz queë' Jesús, ridödisë' ni' suzë'ë la' guixi'. Lë' Simón, xúzgacabi' Alejandro, en Rufo.

²² Gula'chë'ë Jesús lataj na' nazí'i le Gólgota, tu didza' hebreo le rnna lu didza' xidza', Lataj Que Böga' Ícjaru'. ²³ Gulu'ë le guí'jë' Jesús xisi uva nutsi' nöri silá' que yaga mirra, pero Lë' biti' gu'ë le. ²⁴ Ní'irö bulu'dë'ë Jesús lë'e yaga cruz, ate' gula'guísië' lari' nácuë', le gula'zí' que queëgaquië' bönni' na' röjáquië' gudil-la. Bulu'béajë' le gaca bë' para ila'nözinë' bízxilö idela' que queëgaquië'.

²⁵ Naca idú xsila cate' bulu'dë'ë Lë' lë'e yaga cruz. ²⁶ Didza' na' bulu'zöë' lë'e yaga cruz ícjalë' Jesús ca naca le tu'quíë' Lë' rnna caní: "Bönni' Rinná Bé'enë' Bönachi Judío." ²⁷ Bulu'dá'lenë' Jesús tsözxön lë'egaca yaga cruz chopë' gubán, tuë' cuita lë'ë ibëla, en ia'tué' cuita lë'ë yögöla. ²⁸ Caní guca lë na' nazúaj lu guichi lá'ayi, rnna: Gubábalenë' bönni' tuá' dö'.

²⁹ Yugu' bönni' ta'dödë' ni' tu'lidza zi'ë Jesús, en tu'tá ícjagaquië', ta'nnë':

—¡Ön! ¿Naru' uquínnajtso' yudo' queë' Dios, ate' tsonna dzasö uchísatsu' le? ³⁰ ¡Busölá cuinu' na'a, en bötaj lë'e yaga cruz na'!

³¹ Lësca' caní yugu' bixúz unná bë', en yugu' bönni' yudo' usedi tu'titjë' Lë'. Të' luzá'agaquië' tuë' ia'tué':

—Bönachi yúbölö busölë', pero biti' gaca usölá cuinë'.

³² Ta'nnë' ca':

—¡Ön! ¿Nácatsu' Cristo, Bönni' Inná Bé'enë' Bönachi Israel? ¡Bötjatsöca' na'a lë'e yaga cruz para ilé'etu', ate' tséajlë'ëtu' Li'!

Yugu' bönni' na' dá'gaquië' tsözxön len Lë' lë'egaca yaga cruz bulu'lidza zi'ë ca' Lë'.

Le guca cate' gútië' Jesús

(Mt. 27:45-56; Lc. 23:44-49; Jn. 19:28-30)

³³ Cate' bidxín idú huagubidza, guchul-la idútë yödzölió. Guca caní ga bidxintë idú ridödi xihuó.

³⁴ Idú ridödi xihuó na' bë'ë Jesús zidzaj didza', rnnë':

—Eloi, Eloi, ¿lama sabactani?

Didza' hebreo ni rnna lu didza' xidza': Dios quia', Dios quia', ¿bizx que nubéaj ládzu'u neda'?

³⁵ Yugu' bönni' nacu'ë ni' bila'yönnë' didza' ni, ate' ta'nnë':

—Buli'zëtsöca' nágali'. Elías rulidzë'.

³⁶ Ní'irö guxíti'ë tu bönni' nútsë'ë ladjagaquië', en buxúpinë' nupi zi tu le bululu rë'aj nisa. Budë'ë le lahui gui, en bë'ë le xupë' Jesús, rnnë':

—Cöztsöca'ru', uyuru' channö huidë' Elías uzötjë' Lë'.

³⁷ Gurödxí'ë zidzaj Jesús, en la' gútitë'. ³⁸ Biröza' lari' yödx nala' lu yudo'. Birúaj choplö, gudela' icjlö, en birúajtë zxánilö. ³⁹ Bönni' na' rinná bé'enë' bönni' röjáquië' gudil-la zuínë' lahuë' Jesús, en bilé'enë' ca na' guca gurödxí'ë Jesús, en la' gútitë', ate' gunnë':

—Le nácatë bönni' ni' gúquië' Zxí'inë' Dios.

⁴⁰ Nacuá'anu ca' ni' nigula, zí'tu'sö tu'yunu. Nútsa'gacanu ladjagacanu María Magdalena, en Salomé, en María, xiná'agacabi' Jacobo cuidi', en José. ⁴¹ Nigula ni yójacalennu Jesús cate' ni' gudë' luyú Galilea, en gulácalennu Lë', gula'gú'unu le gulahuë'. Nacuá'anu ca' ni' ia'bál-lanu nigula zían gula'zá'lennu Lë' lu yödzö Jerusalén.

Ta'gu'ë Jesús yeru ba

(Mt. 27:57-61; Lc. 23:50-56; Jn. 19:38-42)

⁴² Chizá' ral-la, en naca dza tu'pě'ë, dza si' idxín dza lá'ayi quégauquië' bönni' judío. ⁴³ Que lë ni na' bidë' José, bönni' yödzo Arimatea, bönni' lo ládjagauquië' bönni' yúlalui' lo. Ribözë' ca' dza idinná bē'ë Dios. Idú ládxë'ë guyázië' ga na' zoë' Pilato, en gunábinë' lë' gu'ë lë' lataj u'ë Jesús. ⁴⁴ Bubáninë' Pilato tu' gunné' chigútië' Jesús, ate' bulidzë' bönni' na' rinná bé'enë' bönni' rōjáquië' gudil-la para inábinë' lë' channō chinátië' Jesús. ⁴⁵ Cate' biyönnë' ca na' gunné' bönni' na' rinná bé'enë' bönni' rōjáquië' gudil-la, bē'ë José lataj u'ë Jesús. ⁴⁶ Ní'irō José na' gú'uë' tu lari' xtila dxí'ado', ate' buzötjë' Jesús lë'e yaga cruz, en buchölinë' Lë' lari' na'. Ní'irō gulu'ë Lë' yeru ba nadaj lë'e gu'a guiöj. Budë'ë tu guiöj blaga zxön ga nu riyaza ba na'. ⁴⁷ María Magdalena, en María, xinë'ë José tu'yunu ga na' ta'gu'ë Jesús.

16

Rubanë' Jesús lu yöl-la' guti

(Mt. 28:1-10; Lc. 24:1-12; Jn. 20:1-10)

¹ Cate' chinadödi dza lá'ayi quégaca bönachi judío le naca dza gadxi, María Magdalena, en Salomé, en María, xinë'ë Jacobo, ta'zí'ínu yugu' le rilá' zxixi para tsöjlú'ugacanu Jesús. ² Ni' naca zílado' dza risí lo, yōjācanu ra' yeru ba queë'. Bila'dxinnu ni' cate' si' gulén gubidza. ³ Gula'nábinu luzá'agacanu:

—¿Nuzxi cúatsö queëru' guiöj na' da' ga nu riyaza ba queë'?

⁴ Cate' bila'dxinnu ni', bulu'yunu, en bila'lé'enu chinadúa guiöj na', ate' guiöj zxön naca.

⁵ Gula'yú'unu yeru ba lë'e guí'a guiöj na', ate' ni' bila'lé'enu-bi' tubi' bi'i bönni' ra'bán, nácabi' gubáz lá'ayi queë' Dios. Rõ'öbi' tsölá'a ibëla lu yeru ba na', nácubi' lari' tunna chiguíchido'os. Guládxide'enu.

⁶ Ní'irö bi'i na' gúdxibi' légacanu, rnnabi':

—Bíti'rö gádxili'. Ruguílajli' Jesús, Bönni' Nazaret, Bönni' na' gudë'ë lë'e yaga cruz. Chibubanë'. Biti' zoë' ni. Buli'yú ga ni gula'gu'ë Lë'. ⁷ Guli'tséaj na'a, guli'tsöjtíxjöi'i ca' yugu' bönni' usëda queë', enca' Pedro. Guiëli' légaquië': "Tsejë' Jesús luyú Galilea zí'alö ca libí'ili'. Ní' ulé'eli'-në' ca na' chigudxi cazë' libí'ili'."

⁸ Ní'irö bulu'rúajnu ni', bulu'zxúnnajnu ra' yeru ba na' tu' ta'zxízinu lu yöl-la' radxi ridzöbi quégacanu. Cuntu nu gulënu ca' tu' tádxinu.

*Ruluí'i lahuë' Jesús lonu María Magdalena
(Jn. 20:11-18)*

⁹ Cate' bubanë' Jesús zílado' dza na', buluí'ilahuë' zí'alö lonu María Magdalena, nigula na' bubéajë' gadxi bö' xihui' gula'yú'u lënu. ¹⁰ Guyéajnu yöjtíxjöi'inu nupa na' gula'dalen Jesús. Nupa ni ta'sëbi ládxigaca, en ta'bödxí yechi'. ¹¹ Cate' bila'yöni didza' ruí'inu, zoë' nabanë' Jesús, ate' bilé'e quézinu Lë', bití' gula'yéajlë' lënu.

*Chopë' bönni' usëda queë' Jesús tu'lé'enë' Lë'
(Lc. 24:13-35)*

¹² Gudödi na', nadzá'alö buluí'ilahuë' Jesús lógaquië' chopë' bönni' usëda queë' yú'ugaquië' nōza, sōjáquië' ga naca ladaj guixi'. ¹³ Ní'irö

bulu'dxinë', dutíxjöi'iguequinë' ia'zíca'rë', ate' ni xtídza'gaquië' bití' gula'yéajlë'ë.

*Le rigu'ë Jesús lu ná'agaquië' bönni' gubáz queë'
(Mt. 28:16-20; Lc. 24:36-49; Jn. 20:19-23)*

¹⁴ Ga yöjsetë, bulu'i lahuë' Jesús lógaquië' idx-inéajtë' tsanni ni' ta'bö'ë tahuë', ate' gudil-lë' légaquië' didza' tu' cabí ta'yéajlë'ë Lë', en tu' naca zidi icja ládxi'do'gaquië', tu' cabí gula'yéajlë'ë xtídza'gaca nupa na' bila'lé'e Lë' nubanë'. ¹⁵ Ní'irö gidxë' légaquië', rnnë':

—Guli'tséaj idütë yödzölió tsöjenli' libán que didza' dxi'a lógaca yúgu'të bönachi. ¹⁶ Nu tséajlë' neda', en idila nisa, ulá nu na', pero nu bití' tséajlë', irugu que gati nu na'. ¹⁷ Le ilaca bë' ni ilunë' bönni' ila'yéajlë'ë neda'. Ulu'gunë' dxin La' neda', en ulu'béajë' yugu' bö' xihui' yú'ugaca bönachi, en ilu'ë didza' izá'a. ¹⁸ Channö ila'zönë'-ba' bëla sínia' lu ná'agaquië', o channö ile'jë' le nachë' yöl-la' guti, bití' bi gun quégaquië'. Ila'xóa në'ë nupa te'e, ate' ulu'huöacaté.

*Ruhuëpë' Jesús yehua' yubá
(Lc. 24:50-53; Hc. 1:6-11)*

¹⁹ Cate' Xanru' budxi bë'lenë' légaquië' didza' ni, buchisë' Dios Lë' yehua' yubá ga ni' gurö'ë cuitë' ibëla Lë'. ²⁰ Bila'rúajë' légaquië', yöjéngaquië' libán yúgu'të yödzö. Gúcalenë' Xanru' légaquië', en benë' ga gulunë' le nácgaca bë' naca idütë li didza' tu'ë. Ca' naca.

Didza' cubi rucá'ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

58bf86df-ae22-508c-81dc-936dbf138c25